

萬 有 文 庫

第一集一千種

王 雲 五 主 編

陸 放 翁 集

(九)

陸 游 著

商 務 印 書 館 發 行



陸放翁集

(九)

陸游著

國學基本叢書

# 陸放翁集

劍南詩藁

卷第五

曉歎

一鴉飛鳴窗已白。推枕欲起先歎息。翠華東巡五十年。赤縣神州滿戎狄。主憂臣辱古所云。世間有粟吾得食。少年論兵實狂妄。諫官劾奏常竄殛。不爲孤囚死嶺海。君恩如天豈終極。容身有祿愧滿顏。滅賊無期淚橫臆。未聞舍桃薦宗廟。至今銅甕沒荆棘。幽并從古多烈士。悒悒可令長失職。王師入秦駐一月。傳檄足定河南北。安得揚鞭出散關。下令一變旌旗色。

苦筍

藜藿盤中忽眼明。駢頭脫襜白玉嬰。極知耿介種性別。苦節乃與生俱生。我見魏徵殊媚嫵。約束兒童勿多取。人才自古要養成。放使干霄戰風雨。

月下作

池上迎微風。柏間蹋涼月。冷然醉夢醒。一洗煩惱熱。嗟予世外人。火食常嘔噎。易求雲表露。難覓太古雪。況欲試祕方。瓊漿和玉屑。俛首居俗間。愁若鷹在韁。惟茲服月芒。比歲稍得缺。但今天無雲。豈復計圓缺。玉鉤定誰挂。冰輪了無轍。詩成獨高詠。靈府炯澄澈。

又

畏暑不巾襪。步月櫂短筇。瘦身髮鬢髻。頽影如孤松。徑幽螢闔開。池漲魚噉嚼。飛泉穿北垣。珠玉相撞舂。東湖更奇絕。百畝銀初鎔。但能抱琴往。絕恨欠鶴從。重露傾荷盤。微風墮芙蓉。歡言美清夜。縹緲吹疎鐘。空中飛仙人。粲然冰雪容。笑我老塵世。不記瑤臺逢。

小宴

洗君鸚鵡盃。酌我蒲萄醅。冒雨鶯不去。過春花續開。英雄漫青史。富貴亦黃埃。今夕湖邊醉。還須秉燭回。

小閣納涼

侵牀月白病全蘇。掠面風清酒欲無。渺渺塘陰下鷓鴣。蕭蕭秋意滿菰蒲。縱輪煙渡橫孤艇。也勝京塵暗九衢。莫遣良工更摹寫。此詩端是臥遊圖。

晨雨

揮汗驅蚊廢夜眠。清晨一雨便翛然。涼生池閣衣巾爽。潤入園林草木鮮。青蕝雲腰開鬪茗。翠甕玉液取寒泉。飯餘一枕華胥夢。不怪門生笑腹便。

湖上筇盛出戲作長句

鱗鱗穿苔瑇瑁簪。按行日夜待成林。養渠百尺干霄氣。見我平生及物心。剩插藩籬愛玉折。豫期風雨聽龍吟。明年又徙囊衣去。誰與平安報好音。

雨後集湖上

野水交流自滿畦。芳池新漲恰平堤。花藏密葉多時在。鶯占高枝盡日啼。繡袂寶裙催結束。金尊翠杓共提攜。白頭自喜能狂在。笑鬢蠻牋落醉題。

過大蓬嶺度繩橋至杜秀才山莊

度笮臨千仞。梯山躡半空。溼雲朝暮雨。陰壑古今風。亭觀參差見。闌干詰曲通。柳空叢篠出。松偃翠蘿蒙。負籠銀釵女。鉏畬鶴髮翁。何由有餘俸。小築此山中。

宿杜氏晨起遇雨

怪藤十圍蔽白日。老木千尺干青霄。水泛冥灘竹作舫。陸行跨空繩繫橋。陰陰古屋精靈語。慘慘江雲蛟鱗驕。吾道非耶行至此。諸公正散紫宸朝。

翠圍院

曉入翠圍寺。擁門千萬峯。山空鳥自命。林茂鹿相從。嫋嫋風中笱。昏昏雲外鐘。將歸興未盡。清嘯倚長松。

野飯

薏實炊明珠。苦筍饌白玉。輪囷斲區芋。芳辛采山蕨。山深少鹽酪。淡薄至味足。往往八十翁。登山逐奔鹿。可憐城南社。零落依澗曲。面餘作詩瘦。趨拜尚不俗。杜氏自譜。以爲子美下歎。留一子守浣花舊業。其後避成都亂。徙眉州大壩。或徙大蓬云。病夫益倦遊。頗願老窮谷。是家吾所慕。食菜如食肉。時能喚鄰里。小甕酒新漉。何必懷故鄉。下箸厭雁鷺。

化成院

翠圍至化成。七里幾千盤。肩輿掀滯淖。歎息行路難。緣坡忽入谷。蜿蜒蒼龍蟠。孤塔插空起。雙柁當夏寒。飛屐到上方。漸覺所見寬。前山橫一几。稻陂白漫漫。肥僧大腰腹。呀喘趨迎官。走疾不得語。坐定汗未乾。高人遺世事。跣趺穴蒲團。作此望塵態。豈如返巾冠。日落聞鹿鳴。感我平生歡。客遊殊未已。芳歲行當闌。  
慈雲院東閣小憩

橫閣院東偏。翛然拂榻眠。香濃煙穗直。茶嫩乳花圓。巖倚團團桂。筒分細細泉。憑誰爲題版。榜作小壺天。  
遊靈鷲寺堂中僧闕然獨作禮開山定心尊者尊者唐人有問法者輒點胸示之時號點點和尚  
半世吳松理釣絲。蜀山著腳豈前知。雲堂已散三三衆。卯塔空尋點點師。戴雪數峯臨峭絕。浮花一水舞淪漪。寺西望雪山下臨桃源。勞生未盡能重到。應掃流塵讀此詩。

桃源

木缺橋橫一徑微。斷煙殘靄晚霏霏。十年倦客明雙眼。五月遊人換夾衣。翠峽束成寒練靜。蒼崖濺落素蛟飛。爾來自笑癡頑甚。著處吟哦不記歸。

白塔院時小雨初霽

冷翠千竿玉。浮嵐萬幅屏。凭欄避微雨。挈笠遇歸僧。殘日明樓角。屯雲擁塔層。溪山屬閑客。隨意倚枯藤。  
急雨

炎炎赤日當空燒。簿書圍坐如居窰。黑雲壓簷忽崑嶠。急雨鼎來風駕潮。彈壓旱氣蘇枯焦。祝融退聽不敢驕。父老歇舞看稻苗。殺雞買酒更相邀。我亦巾褐涼蕭蕭。酒醒點滴聞梧蕉。珍簟不御扇罷搖。安用萬

里登凌歊

東湖新竹

插棘編籬謹護持。養成寒碧映淪漪。清風掠地秋先到。赤日行天午不知。解籜時聞聲簌簌。放梢初見葉離離。官閑我欲頻來此。枕簟仍教到處隨。

睡起試茶

笛材細織含風漪。蟬翼新裁雲碧帷。端谿硯璞斲作枕。素屏畫出月墮空江時。朱欄碧甃玉色井。自候銀餅試蒙頂。門前剝啄不嫌渠。但恨此味無人領。

五月五日蜀州放解勝第一人楊鑑具慶下孤生愴然有感

甲午五月之庚寅。淵魚躍起三江津。震雷霹靂雨夜達。晨我知決定非凡鱗。人生富貴不逮親。萬鍾五鼎空酸辛。少年得祿羞常珍。調節滋味躬饗新。徹食奉盥授帨巾。此樂豈復論賤貧。嗟我不孝負鬼神。俯仰二紀悲如新。仕宦空飽息與嬾。左右供養無復辰。子行射策對楓宸。綵衣楚楚暎華紳。泝江亟歸娛老人。切勿著意長安春。

病酒新愈獨臥蘋風閣戲書

用酒驅愁如伐國。敵雖摧破吾亦病。狂呼起舞先自困。閉戶垂帷真廟勝。今朝屏事臥湖邊。不但心空兼耳靜。自燒沉水淪紫箒。聊遣森嚴配堅正。紫筍蒙頂之上者。其味尤重。追思昨日乃可笑。倚醉題詩恣豪橫。逝從屈子學獨醒。免使曹公怪中聖。

神君歌謁英顯廟作

秦山可爲礪。東海可揚塵。惟有壯士志。死生要一伸。我夢神君自天下。威儀奕奕難具陳。飛龍駕車不用馬。訶前殿後皆鬼神。奇形詭狀密如魚鱗。鱗鱗鬣鬣爭扶車輪。黑霧白旄。其來無垠。黃霧紫氛。合散輪囷。考錄魍魎。號呼吟呻。約束蛟螭。天矯服馴。後車百兩。載美人。山構鮮麗。工笑顰。金尊翠杓。溢芳醇。琵琶篋篋飾怪珍。世間局促常悲辛。神君歡樂千萬春。嗚呼。生不封侯死廟食。丈夫豈得抱志長默默。

讀胡基仲舊詩有感

少日飛騰翰墨場。暮年相見尙昂藏。沈沙舟畔千帆過。剪翮籠邊百鳥翔。訪古每思春竝轡。說詩仍記夜連牀。匆匆去日多於髮。不獨悲君亦自傷。

夏日湖上

烏帽筇枝散客愁。不妨肯史雜沙鷗。迎風枕簟平欺暑。近水簾櫳探借秋。茶竈遠從林下見。釣筒常向月中收。江湖四十餘年夢。豈信人間有蜀州。

對酒歎

鏡雖明。不能使醜者妍。酒雖美。不能使悲者樂。男子之生。桑弧蓬矢射四方。古人所懷何磊落。我欲北臨黃河。觀禹功。犬羊腥羶塵漠漠。又欲南適蒼梧。弔虞舜。九疑難尋。眇聯絡。惟有一片心。可受生死託。千金輕擲。重意氣。百舍孤征。赴然諾。或攜短劍。隱紅塵。亦入名山。燒大藥。兒女何足顧。歲月不貸人。黑貂十年弊。白髮一朝新。半酣耿耿不自得。清嘯長歌裂金石。曲終四座慘悲風。人人掩淚無人色。



病後暑雨書懷

髮毛蕭颯疾初平。雲物輪囷氣未清。水漲小亭無路到。雨多幽草上牆生。窗昏頓減繡書課。屋老時聞墮瓦聲。止酒亡聊還自笑。少年豪飲似長鯨。

雨聲

暑氣滿天地。薄暮加煩促。清風吹急雨。集我北窗竹。竹聲蕭蕭固自奇。況得雨聲相發揮。令人忽憶雲門寺。半夜長松墮雪時。

同何元立賞荷花追懷鏡湖舊遊

少狂欺酒氣吐虹。一笑未了千觴空。涼堂下簾人似玉。月色泠泠透湘竹。三更畫船穿藕花。花爲四壁船爲家。不須更踏花底藕。但嗅花香已無酒。花深不見畫船行。天風空吹白紵聲。雙槳歸來弄湖水。往往湖邊人已起。卽今憔悴不堪論。賴有何郎共此尊。紅綠疎疎君勿歎。漢嘉去歲無荷看。

小樓

吾州近在西山麓。雪山萬仞臨冰谷。小樓森森閱三伏。清簟疎簾對碁局。肌膚凜凜起芒粟。肝肺崢嶸疊瓊玉。香泉向夕初罷浴。桐竹生風吹細縠。九衢憧憧車擊轂。黃塵赤日汗可掬。還家欲休客陸續。借與此詩令一讀。

怡齋

東湖仲夏草樹荒。屋古無人亭午涼。萱房微呀不見日。筍籜自解時吹香。野藤蟠屈入窗罅。溼菌扶疎生

屋梁跨溝數椽最幽翳。漲水及檻雨敗牆。靜涵青蘋舞藻荇。閑立白鷺浮鴛鴦。芙蓉雖瘦亦瀾漫。照眼翠蓋遮紅粧。水紋珍簾欲卷卻。團團素扇嬾復將。天風忽送塔鈴語。喚覺清夢遊瀟湘。

龍湫歌

環湫巨木老不花。齋淪千尺龍所家。爪痕入木欲數寸。觀者心掉不敢譁。去年大旱綿千里。禾不立苗麥垂死。林神社鬼無奈何。老龍欠伸徐一起。隆隆之雷浩浩風。倒卷江水傾虛空。鱗間出火作飛電。金蛇夜掣層雲中。明朝父老來賽雨。大巫吹簫小巫舞。祠門人散月娟娟。龍歸抱珠湫底眠。

月夕

我昔隱天台。夜半遊句曲。弄月過垂虹。萬頃一片玉。煙艇起菱唱。水風吹釣絲。更欲小徙倚。恐失初平期。今年遊青城。三十六峯巒。白雲反在下。使我毛骨寒。天如玻璃鍾。倒覆溼銀海。素壁行其間。草木盡光彩。姮娥顧我笑。手撫玉兔兒。莫怪世人生白髮。秋風桂老欲無枝。

蒸暑思梁州述懷

宜和之末予始生。遭亂不及遊司并。從軍梁州亦少慰。土脈深厚泉流清。季秋嶺谷浩積雪。二月草木初抽萌。夏中高涼最可喜。不省舉手驅蟲蟲。藏冰一出賣滿市。玉璞堆積寒嶢嶢。柳陰夜臥千駟馬。沙上露宿連營兵。胡笳吹墮漾水月。烽燧傳到山南城。最思出甲成秦隴。戈戟徹夜相靡聲。兩年劍南走塵土。肺熱煩促無時平。荒池昏夜蛙閣閣。食案白日蠅營營。何時王師自天下。雷雨瀕洞收機槍。老生衰病畏暑溼。思卜鄠杜開柴荆。

湖上晚歸

地僻多幽事。官閑慰古心。晚花藏密葉。新筍補疎林。碩果哇丁獻。芳醪稚子斟。碧雲遮日盡。歸路更蕭森。

秋聲

人言悲秋難爲情。我喜枕上聞秋聲。快鷹下韝爪觜健。壯士撫劍精神生。我亦奮迅起衰病。唾手便有擒胡興。弦開雁落詩亦成。筆力未饒弓力勁。五原草枯苜蓿空。青海蕭蕭風卷蓬。草罷捷書重上馬。卻從鸞駕下遼東。

觀小孤山圖

江平風不生。鏡面渺千里。軻峨萬斛舟。遠望一點耳。大孤江中央。四面峭插水。小孤特奇麗。丹翠凌雲起。重樓邃殿神之家。帳中美人粲如花。遊人徒倚欄干處。俊鶴橫江東北去。

飲酒

陸生學道欠力量。胸次未能和盎盎。百年自笑足悲歡。萬事聊須付酣暢。有時堆阜起崢嶸。大呼索酒澆使平。世間豈無道師與禪老。不如閉門參麴生。朋舊年來散如水。惟有鑑杓同生死。一日不見令人愁。晝夜共處終無尤。世言有毒在麴蘖。腐脇穿腸凝血脈。人生適意卽爲之。醉死愁生君自擇。

北窗梧葉坐間落四五有感

高梧一葉脫。便覺秋不遠。晨起髮滿梳。吾衰孰云晚。古來追電足。歷塊或小踈。金鼓噪陳間。此任豈驚蹇。女子則多怨。丈夫當自反。默觀憂患機。推見生死本。山林嫌獨往。臺省亦衰衰。會稽歸去來。臯橋住差穩。

神山歌

吾聞海中五神山。其根戴以十五鼈。一朝六鼈被釣去。偕輿員嶠沉洪濤。尙餘三山歸然在。當時不沒爭秋毫。如何蓬萊又已淺。忽見平地生藜蒿。伏羲迨今幾萬歲。世事如火煎油膏。娶妻不敢待翁命。治水無暇憐兒號。避讒奔楚僅得免。歷聘返魯終不遭。老聃關尹亦又死。人實危脆無堅牢。有口惟可飲醇醪。有手惟可持霜螯。勿令他人復笑汝。後有萬世來滔滔。

久雨

昏昏風雨暗東湖。恰似梅黃四月初。高樹送聲驚客枕。小池分溜入清渠。飛蛟屏迹知何在。團扇生塵已暗疎。須信西遊有奇事。今年三伏夜觀書。

古意

緹足飼飢鷹。鷹飽意未平。伏櫪豈不安。老驥終悲鳴。士生固欲達。又懼徒富貴。素願有未伸。五鼎淡無味。茅屋秋雨漏。稻陂春水深。長歌傾濁酒。舉世不知心。

自唐安之成都

出門猶苦雨。度壑喜新晴。日正車無影。風高蓋有聲。疎疎稚苗立。鬱鬱晚桑生。宿醉行猶倦。無人爲解醒。

度笮江原縣

翩翩翻翻笮受風。行人疾走緣虛空。回觀目眩浪花上。小跌身裹蛟涎中。汗沾兩握色如菜。數乘此險私自怪。九折元非叱馭行。千金空犯垂堂戒。此身老大足悲傷。歲歲天涯憶故鄉。安得畫船明月夜。滿川歌

吹入盤闔。蓋闔姑蘇二門名。

故袍

青衫猶是國工裁。破篋塵侵手自開。莫笑渾如霜葉闔。兩朝曾見聖君來。

寓寶相有作

掃地鏡面清。燒香雲氣潤。道人敬愛客。危坐目不瞬。童子髡兩髦。經禪亦精進。我來願同龕。歡喜無少吝。臨堂坐夜分。佛燈看墮燼。清晨爽如秋。攝衣相問訊。道在氛埃表。此語其殆信。永愧小阮高。超然棄鬚鬢。從子綽棄其婦爲僧廬山。

寓驛舍予三至成都皆館于是

閑坊古驛掩朱扉。又憩空堂綻客衣。九萬里中鯤自化。一千年外鶴仍歸。遶庭數竹饒新筍。解帶量松長舊圍。惟有壁間詩句在。暗塵殘墨兩依依。

題宇文子友所藏薛公鶴

仙人騏驥絕世稀。卵生凡禽似而非。宮保妙筆窮化機。縞衣玄裳真令威。千年華表聊一歸。回首幸脫乘軒譏。喙吞不恨菰米微。從吾曹遊安得肥。

宴西樓

西樓遺跡尙豪雄。錦繡笙簫在半空。萬里囚循成久客。一年容易又秋風。燭光低映珠幃麗。酒暈徐添玉頰紅。歸路迎涼更堪愛。摩訶池上月方中。

月中歸驛舍六月十四日

歲歲常爲錦水行。驛前雙堦慣逢迎。草深閑院蟲相語。人靜空廊月自明。病起酒徒嘲小戶。才衰詩律媿長城。何時卻泛耶溪路。臥聽菱歌四面聲。

江濱池醉歸馬上作

久住西州似宿緣。笙歌叢裏著華顛。每嗟相見多生客。卻憶初來尙少年。迎馬綠楊爭拂帽。滿街丹荔不論錢。浮生何處非羈旅。休問東吳萬里船。

離成都後卻寄公壽子友德稱

蕭條常閉爵羅門。點檢朋儕幾箇存。吾道將爲天下裂。此心難與俗人言。逢時尙可還三代。掩卷何由作九原。寄語龜城舊交道。新涼殊憶共清尊。

晨至湖上

劍南無劇暑。長夏更宜人。啼鳥常終日。幽花不減春。荷香浮綠酒。藤露落烏巾。莫作天涯想。翛然夢裏身。

又

園古逢秋好。身閑與嬾宜。空堂賞疎豁。重閣望參差。竹粉有新意。松風含古姿。低回慙祿米。官事少於詩。

池上見魚躍有懷姑熟舊遊

雨過回塘漲碧漪。幽人閑照角巾欹。銀刀忽裂圓波出。宛似姑溪晚泊時。

六月二十五日曉出郊

劍南作客歲再淹。正如病翼遭糲黏。短衣射虎性所樂。不耐醒齷垂車幘。今晨偶出得一快。欣然意若脫楚鉗。曉星已疎更磊磊。殘月欲盡猶纖纖。雞鳴已與夜漏斷。鴉起似逐朝陽暹。揚鞭走馬忘老懶。自笑狂疾何由砭。

作雨不成終夜極涼時去立秋五日也

雲映星芒澹。風闌雨腳回。體輕知病去。氣爽喜秋來。疎放拋烏帽。歌呼覆綠盃。東歸定何日。灑灑欲崔嵬。

池上晚雨

烏紗白葛一枝筇。卷畫池邊遡晚風。雲葉初生高樹外。雨聲已到亂荷中。憑闌頓覺氛埃遠。回首方知暑毒空。閱世萬端惟小忍。何人更事似衰翁。

五十

五十未名老。無如衰疾何。肺肝空激烈。顏鬢已蹉跎。夜宴看長劍。秋風舞短裘。此身如砥柱。猶足閱頽波。

記夢

夢泛扁舟禹廟前。中流拂面風泠然。樓臺縹緲知幾疊。雲物點綴多餘妍。蓮房芙蓉采無主。漁歌菱唱聲滿川。夢中了了知是夢。卻恐燕語來驚眠。弄撓顧謂共載客。乖離不記經幾年。卽今相逢兩幻質。轉盼變滅如飛煙。斯言未竟客大笑。人生寓世豈獨堅。元章嘉叟君所見。一別丹旄俱翩翩。君知夢覺本無異。勿爲畫甃流饑涎。我慙俛首夢亦斷。尙覺細浪鳴船舷。

凭欄

蟬嘒晚尤壯。鴉栖久未安。不成浮解艇。故作凭闌干。露重傾荷蓋。風尖蹙芙蓉。新秋動歸思。更覺五湖寬。

聽琴

疎簾曲檻蘋風涼。細腰美人藕絲裳。綠藤水文穿矮牀。玉指纖纖彈履霜。高林鶯囀日正長。幽澗泉鳴夜未央。哀思不怨和而莊。有齊淑女禮自防。世人但惑青樓倡。琵琶篋雜胡羌。試聽一曲醒汝狂。文姬指法傳中郎。

秋思

烈日炎天欲不禁。喜逢秋色到園林。雲陰映日初蕭瑟。露氣侵簾已峭深。衰髮凋零隨槁葉。苦吟淒斷雜疎碁。鴈來不得中原信。撫劍何人識壯心。

醉書

似閑有俸錢。似仕無簿書。似長免事任。似屬非走趨。病能加餐飯。老與酒不疎。婆娑東湖上。幽曠足自娛。時時喚客醉。小閣臨紅蕖。釣魚斫銀絲。擘荔見玉膚。檀槽列四十。遺聲傳故都。豈惟豪兩川。自足誇東吳。但恨詩不進。榛荒失耘耰。何當掃纖豔。傑作追黃初。

樊氏莊龜泉

曳尾穹龜不負圖。一泓寒碧照庭除。醉中只合長來此。臥聽蠻童放轆轤。

書懷

楚澤巴江兩鬢殘。夕陽又是倚闌干。敢言日與長安遠。惟恨天如蜀道難。客枕五更歸夢短。新詩千首後



人看青簾白舫何時發。醉聽琵琶興已闌。唐安絃索爲兩川冠。

又

西風蕭瑟晚吹衣。又見亭臯木葉飛。已是中年頻作惡。更堪秋日送將歸。時何守還宵城。黃塵顏鬢無人識。青史功名與願違。彊把一盃還徑醉。羈懷何必不依依。

秋思

大面山前秋笛清。細腰宮畔暮灘平。吳檣楚柁動歸思。隨月巴雲空復情。萬里風塵舊朝士。百年鉛槧老書生。水村漁市從今始。安用區區海內名。

又

巢燕成歸秋景奇。頗容老子醉哦詩。山晴更覺雲含態。風定閑看水弄姿。痛飲何由從次道。竝遊空復憶安期。天涯又作經年客。莫對青銅恨鬢絲。

又

西風吹葉滿湖邊。初換秋衣獨慨然。白首有詩悲蜀道。清宵無夢到鈞天。迂疎早不營三窟。流落今寧直一錢。把酒未妨餘興在。試憑絲管餞流年。

東園晚步

久客天涯憶故園。疆名官寺只衡門。秋桐蠹遍無全葉。古柳吹斜出半根。痛飲每思尊酒窄。微官空羨布衣尊。何時定下三巴去。思臥孤舟聽斷猿。

秋夜讀書戲作

別駕生涯似蠹魚。簡編垂老未相疎。也知賦得寒儒分。五十燈前見細書。

太平花花出劍南。似桃四出千百包。駢萃成桑天聖中。獻至京師。仁宗賜名太平花。

扶牀踉蹌出京華。頭白車書未一家。宵旰至今勞聖主。淚痕空對太平花。

日暮至湖上

籃輿晚繞湖。樂此新秋涼。粉落竹方老。紅凋荷更香。天宇無纖雲。仰視鴻鵠翔。小樓久不登。撫檻悲慨慷。浮生寄一夢。共盡無彭殤。況我數月客。轉眼促去裝。顧作兒女態。裴徊惜流光。簷角迎夜月。林間送斜陽。四年已五遷。終歲常遑遑。安得一茆屋。歸老樵風旁。會稽山南有溪名樵風。涇其上卽若耶。

秋興

無處逢秋不黯然。驛前斜日渡頭煙。吟肩雅與寒驢稱。歸夢頻爭社燕先。百歲猶穿幾兩屐。千詩不及一囊錢。故應身世如團扇。已向人間耐棄捐。

秋色

一段淒涼傍酒盃。中年剩作楚囚哀。迢迢似伴明河出。慘慘如隨落照來。客路半生常淚眼。鄉關萬里更危臺。蓼汀荻浦江南岸。自入秋來夢幾回。

秋聲

蕭騷拂樹過中庭。何處人間有此聲。漲水雨餘晨放閘。騎兵戰罷夜還營。閑憑曲几聽雖久。彊撫哀絃寫

不成暑退涼生君勿喜。一年光景又崢嶸。

### 觀長安城圖

許國雖堅鬢已斑。山南經歲望南山。橫戈上馬嗟心在。穿塹環城笑虜孱。驟者言塹穿塹三重環。長安城。日暮風煙傳隴上。秋高刁斗落雲間。三秦父老應惆悵。不見王師出散關。

### 雨中作

方驚歲更端。不覺秋已孟。雖云暑毒埃。無奈風雨橫。荷空湖面闊。葉脫樹枝勁。百卉亦已衰。非復昔華盛。遊子老忘歸。一榻臥衰病。欲談無客來。向壁弄塵柄。

### 夜讀了翁遺文有感

秋雨蕭蕭夜不眠。挑燈開卷意凄然。吾曹自欲期千載。世論何曾待百年。當日公卿笑迂闊。卽今河洛污腥羶。陰陽消長從來事。玩易深知屢絕編。公有易傳。

### 雷

君不見冬月雷。深藏九地底。寂默如寒灰。紛紛槁葉木。盡脫蠢蠢蟄。戶蟲爭坯。堅冰積雪一朝盡。風搖天邊斗柄回。雷聲卻擘九地出。般般似挾春俱來。魚龍振鱗熟睡醒。桃李一笑韶顏開。候耕老農喜欲舞。掀泥百草知誰催。惟嗟婦女不解事。深屋揜耳藏嬰孩。吾聞陰陽有常數。非時動靜皆爲菑。無人爲報阿香道。時來何至勞卿推。

### 龍眠畫馬

國家一從失西陲。年年買馬西南夷。瘴鄉所產非權奇。邊頭歲入幾番一作數皮。崔嵬瘦骨帶火印。離立欲不禁風吹。圉人太僕空列位。龍媒汗血來何時。李公太平官京師。立仗慣見渥洼姿。斷縑歲久墨色暗。逸氣尙若不可羈。賞奇好古自一癖。感事憂國空餘悲。嗚呼安得毛骨若此三千疋。銜枚夜度桑乾磧。

秋夜池上作

短髮颺颺病骨輕。臨池閑看露荷傾。月明何與浮雲事。正向圓時故故生。

秋雨

西山雲千重。東園泥一尺。可憐牆下路。十日無履迹。空庭桐葉盡。古甃土花碧。坐懷江湖間。病鴈溼羽翮。寒窗向人青。衰髮垂領白。孤吟更不寐。聊伴候蟲噴。

臥病

人生寓一氣。血脉日夜流。秋毫或壅隔。百體若相仇。嗟子少多艱。衣食拙自謀。方寸叢百慮。如箭集射侯。奔走連數歲。呻吟劇茲秋。生死亦何有成壞。同一漚。胡爲不自愛。森然起戈矛。一笑衆妄滅。霜天鷹睨鞫。呼兒屏藥囊。吾疾今其瘳。

夢入禪林有老宿方陸座或云通悟禪師也

塵埃車馬何憧憧。驢頭鼠目厭妄庸。樂哉夢見德人容。巍巍堂堂人中龍。舉頭仰望太華峯。攝衣欲往路無從。忽然夢斷難再逢。空記說法聲如鐘。

曉東戎衣一悵然。五年奔走遍窮邊。平生亭障休兵日。慘澹風雲閱武天。戍隴舊遊真一夢。渡遼奇事付他年。劉琨晚抱聞雞恨。安得英雄共著鞭。

放懷亭獨立有感

葦叢枯倒蓼花紅。小立東湖更向東。委肉本知居几上。翦翎何恨著籠中。一筇信腳乾坤迓。百榼澆愁寵辱空。誰道窮途知舊少。此心念念與天通。

九月三日同呂周輔教授遊大邑諸山

大邑知名杜叟詩。山中仍值菊花時。節旄落盡羈臣老。髀肉生來壯士悲。豪舉每嫌盃綠淺。癡頑頗怪鬢絲遲。廣文別乘官俱冷。相伴寬爲五日期。

次韻周輔道中

山靈喜我馬蹄聲。正用此時秋雨晴。日淺風斜江上路。蘆花也似柳花輕。

又

從來重九如寒食。天氣微陰正自佳。莫問茱萸賜朝士。一尊隨處有黃花。

憩黃秀才書堂

吾生如虛舟。萬里常泛泛。終年厭作客。著處思繫纜。道邊何人居。花竹頗閑淡。門庭淨如拭。窗几光可鑑。堂上滿架書。朱黃方點勘。把茅容卜鄰。老死更誰憾。

夜宿鶴鳴山。山蓋張天師學道之地。事與史合。

西遊萬里已關天。采藥名山亦宿緣。老柏干霄如許壽。幽花泣露爲誰妍。苔黏石磴捫蘿上。燈耿雲房掃榻眠。安得仙翁索米術。一生留此弄寒泉。索米謂五斗米法。

次韻周輔霧中作

一日監輿十過溪。丹萸黃菊及佳時。端居恐作他年恨。聯轡聊成此段奇。側磴下臨重澗黑。亂雲高出一峯危。何時關輔胡塵靜。大華山頭更卜期。

山中得長句戲呈周輔并簡朱縣丞

鶴鳴山空無鶴來。青霞嶂深天壁開。千巖角逐互吞吐。一峯拔起矜崔嵬。日光微漏潭見底。青霞嶂碧玉潭。昔霧中佳處。水氣上薄雲成堆。幽禽飛鳴報客至。奇樹璀璨知誰栽。花藤怪蔓白晝暗。奔猿落狢無時哀。路窮尙躡一千級。忽見密竹藏樓臺。共言神僧昔住此。至今光景如天台。檜筇負笠出復沒。喜動婦人驚提孩。高人何至作狡獪。無乃翫世聊相談。不然學道窮實際。詎捨正大崇奇瓌。儒林丈人學擅世。餘事尙壓蔡與崔。名山未死可再到。此士一失難重陪。贊府摘山事如織。擺撥領客何奇哉。境幽神館不可住。歸倩玉手傳金盃。朱君有侍兒許爲客出。

擣藥鳥霧中有此鳥鳴聲清絕正如杵藥

白髮無情日日生。散愁聊復作山行。幽禽似欲朝衰病。故學禪房杵藥聲。

出山

出山似與高人別。回首時時一悵然。它日再來緣要熟。遍題名姓綠巖邊。

平雲亭大邑

滿榼芳醪何處傾。金鷲背上得同行。天垂綠野三邊盡。雲與朱闌一樣平。煙樹微茫疑誤墨。風松蕭瑟有新聲。黃花未吐無多恨。也勝湘纍拾落英。

高秋亭大邑

三日山中醉復醒。徑歸回首愧山靈。從今惜取觀書眼。長看天西萬疊青。

九日小疾不出

病厭追遊懶舉觴。今年閉戶作重陽。香煙裊裊閑縈几。書卷紛紛靜滿牀。斜日更增秋慘淡。黃花應怪客淒涼。長安光景還如昨。誰醉城南杜曲旁。昔官都下。每以九日遊西湖諸寺。

九日試霧中僧所贈茶

少逢重九事豪華。南陌雕鞍擁鈿車。今日蜀州生白髮。瓦爐獨試霧中茶。

我有美酒歌

我有美酒起自斟。勸君一卮爲君吟。素衣未遂京塵化。綠鬢已受吳霜侵。三巴塗路何嶽崕。五溪霧潦多毒淫。虎豹夜嘯裂崖谷。魍魅晝出矜山林。身如槁葉墮幽窵。官宦何啼千尺深。無因剖胸出此心。一寸孤忠天寶臨。

次韻師伯渾見寄

窮鄉久客易消魂。短髮秋來白幾分。夢泛扁舟鏡湖月。身騎瘦馬劍關雲。萬釘寶帶知何用。九轉金丹幸

有聞欲與先生同此計。會營茅舍近江濱。伯渾隱龍山。僕亦有結茅菴津之意。

自江源過雙流不宿徑行之成都

斷笮飄飄挂渡頭。臨江立馬喚漁舟。少城已破繁華夢。老境聊尋汗漫遊。斜日驛門雙堠立。早霜風葉一林秋。詩材滿路無人取。準擬歸驂到處留。

過綠楊橋

過縣東馳十里遙。行吟不覺度谿橋。磴輪激水無時息。酒旆迎風盡日搖。半掩店門燈煜煜。橫穿村市馬蕭蕭。秦吳萬里行幾遍。莫恨尊前綠鬢凋。

五鼓自簇橋入府

曉月有餘光。秋樹無濃影。野煙浩無際。陂路行愈永。堰聲何澎湃。露氣正淒冷。忽然客愁破。更覺詩律整。昔人千載意。忙裏一笑領。山林豈難歸。吾計自不猛。

客多福院晨起

萬鯨傳響徹修廊。喚起衰翁曉夢長。萬事可憐隨日出。一生常是伴人忙。馳驅深厭交飛蓋。息偃何時靜炷香。四到錦城身愈老。更堪重入少年場。

雨中出謁歸晝臥

宿雨盈車轍。秋風漲帽幫。愛閑惟兀兀。應俗苦紛紛。病眼添花暈。醜顏散縷紋。歸來炷香臥。窗底看微雲。

長歌行



人生不作安期生。醉入東海騎長鯨。猶當出作李西平。手梟逆賊清舊京。金印煌煌未入手。白髮種種來無情。成都古寺臥秋晚。落日偏傍僧窗明。豈其馬上破賊手。哦詩長作寒螿鳴。興來買盡市橋酒。大車磊落堆長餅。哀絲豪竹助劇飲。如鉅野受黃河傾。平時一滴不入口。意氣頓使千人驚。國讎未報壯士老。匣中寶劍夜有聲。何當凱還宴將士。三更雪壓飛狐城。

夜食炒栗有感。漏舍待朝。朝士往往食此。

齒根浮動歎吾衰。山栗炮燂療夜飢。喚起少年京輦夢。和寧門外早朝來。

### 秋夜懷吳中

秋夜挑燈讀楚辭。昔人句句不吾欺。更堪臨水登山處。正是浮家泛宅時。巴酒不能消客恨。蜀巫空解報歸期。灞橋煙柳知何限。誰念行人寄一枝。

### 遊三井觀

三井久知名。暇日偶一訪。棟宇壞欲盡。基址尙闕壯。畫牆皆國工。煙雲儼天仗。旌旄亞戈戟。佩玉雜弓鞞。太古實傑作。筆落九天上。吳生名擅世。睥睨未肯讓。規模遠有考。意象豪不放。最奇老癯仙。骨立神愈王。石恪雖少怪。用筆亦跌宕。兩姝淡蛾眉。非復火食狀。塵埃久侵蝕。風雨無蓋障。好事未易逢。寧能久亡恙。雍洛劫火餘。妙迹盡凋喪。斯遊恐難繼。佇立增悄愴。

### 仙遊閣

張公一去二百載。傑閣依然橫竄中。徙倚看碑仍看畫。時聞柏子落秋風。

寓居小菴纔表丈戲作

早衰甚畏寒。颼颼厭空館。登閣望東菴。亭亭長一繖。欣然願暫寓。竹底門可款。外看磔蝟毛。仰視覆鵝卵。席纔置錐地。牖若窺天管。瓦爐香不去。菅寢衾易暖。頗疑漁菴結。又類土室窳。家具止囊衣。弛擔著亦滿。客來勿嗤陋。老我善用短。猶能設胡牀。相喚共茗椀。

送華師從劍州張祕書之招

三年相伴錦江頭。一日翩然不可留。官冷蓬門無客戀。時清劍閣有僧遊。關山默數來時路。風月懸知別後愁。禪版經龕有餘暇。頻登高處望西州。

卷第六

江上對酒作

把酒不能飲。苦淚滴酒觴。醉酒蜀江中。和淚下荆楊。樓櫓壓溢口。山川蟠武昌。石頭與鍾阜。南望鬱蒼蒼。戈船破浪飛。鐵騎射日光。胡來卽送死。詎能犯金湯。汴洛我舊都。燕趙我舊疆。請書一尺檄。爲國平胡羌。

自嘲

華子中年百事忘。稽生仍坐嬾爲妨。病於榮宦冥心久。老向端閑得味長。對客欲談還憤憤。讀書纔過已茫茫。青縑帳暖黃紬穩。聊借東菴作睡鄉。

暮歸馬上作

石筍街頭日落時。銅壺閣上角聲悲。不辭與世終難合。惟恨無人麤見知。寶馬俊遊春浩蕩。江樓豪飲夜淋漓。醉來剩欲吟梁父。千古隆中可與期。

臨別成都帳飲萬里橋贈譚德稱

成都城南萬里橋。蘆根蘓末風蕭蕭。暎花碾草鈿車小。駐坡驀潤青驄驕。入門翠徑絕窈窕。臨水飛觀何崑嶠。判無功名著不朽。惟仗詩酒寬亡聊。迎霜早已足雉兔。微冷便欲思狐貂。喜看縷脰暎盤箸。恨欠斫蟹加橙椒。坐中譚侯天下士。龍馬毛骨矜超遙。烏犀白紵謫仙樣。但可邂逅不可招。今年一戰馘餘子。風送六翩凌青霄。美人再拜乞利市。醉墨飛落生蛟綃。我衰於世百無用。十年不趁含元朝。華纓肯傍蕭颯鬢。寶帶那束龍鍾腰。祝君好去事明主。日望分喜來漁樵。遊談引類亦細事。寄酒且解相如消。

夜宿二江驛

雞鳴原前風折樹。夜到雙流雨如注。樺皮溼透點不明。旋設篝爐燎衣袴。重城回首一夢散。錦障氈車渺無處。新聲猶傍耳邊來。殘酒半隨風力去。飛觴縱飲亦何樂。憤憤不堪長閉戶。丈夫要爲國平胡。俗子豈識吾所寓。

涉白馬渡慨然有懷

我馬顧影嘶。忽涉白馬津。雖非黃河上。撫事猶悲辛。太行之下吹虜塵。燕南趙北空無人。袁曹百戰相持處。犬羊堂堂自來去。

瑞草橋

柘葉飈颺雪意驕。檐頭雙兔遇歸樵。宿醒未解題詩嬾。虛過風流瑞草橋。

將之榮州取道青城

倚天山作海濤傾。看遍人間兩赤城。青城山一名赤城。而天台之赤城乃予舊遊。自笑年年隨宦牒。不如處處說閑行。草痕沙際猶餘綠。楓葉霜餘已帶頰。歸去還堪咤兒輩。錦囊三十六崢嶸。

丈人觀

黃金篆書扁朱門。夾道巨竹屯蒼雲。崖嶺劃若天地分。千柱耽耽壓其垠。纓冠肅謁丈人君。廣殿空庭吹寶熏。摩挲畫橋手爲鞍。異哉山蕝與土殖。物怪鬻鬻冠丘墳。仙人佩玉雜輓盼。手整貂冠最不羣。欲去不忍恨日暍。道翁采藥晝夜勤。松根茯苓獲兼斤。人之植立彊骨筋。枸杞羣吹聲狺狺。山爐小甑吹幽芬。朱顏不飲常自醺。我亦宿誦五千文。一念之差隨世紛。逝將從翁走如麋。隱書祕訣何由聞。

題丈人觀道院壁

斷香浮月磬聲殘。木影如龍布石壇。偶駕青鸞塵世窄。閑吹玉笛洞天寒。奇香滿院晨炊藥。異氣穿巖夜浴丹。却笑飛仙未忘俗。金貂猶著侍中冠。孫太古畫范長生作舉手整貂蟬像。神氣尤奇逸。

宿上清宮

九萬天衢浩浩風。此身真是一枯蓬。盤蔬采掇多靈藥。閑道攀躋出半空。累盡神仙端可致。心虛造化欲無功。金丹定解幽人意。散作山椒百炬紅。夜中山谷火煜然。俗謂聖燈。意古藏丹所化也。

自上清延慶歸過丈人觀少留

再到蓬萊路欲平。却吹長笛過青城。空山霜葉無行迹。半嶺天風有嘯聲。細棧跨雲綦峭絕。危橋飛柱插澄清。玉華更控青鸞住。要倚欄干待月明。玉華樓名。

長生觀觀月

碧天萬里月正中。清夜弭節長生宮。廣寒忽墮人間世。但怪步虛聲散瑤臺空。四山沉沉萬籟寂。天矯髯龍舞娛客。弭貂老仙期不來。獨倚欄干吹玉笛。道人不怕九霄寒。銀闕冰壺處處看。天台四萬八千丈。明年照我扶藜杖。

儲福觀唐玉真公主修真之地。

路轉屏風疊。雲藏帝子家。窮幽行磴确。息倦倚槎牙。綠蘚封茶樹。清霜折藥花。世無勾漏令。誰此養丹砂。

龍門洞

我來香積寺。清晨歷龍門。孤峯撐蒼昊。大壑裂厚坤。古穴吹腥風。峭壁挂爪痕。水浮石楠花。崖絡菖蒲根。橫策意未厭。褰裳探其源。絕境豈可名。恨我詩語煩。須臾蒼雲合。使恐白雨翻。東走得平野。萬里扶桑暎。

布金院

萬里西來了宿緣。憑鞭欹帽過年年。山寒院落開爐月。霜重郊原斲芋天。淺碧鱗鱗人度徇。長空杳杳鳥衝煙。夜投蕭寺清無寐。樓角三更月滿川。

離堆伏龍祠觀孫太古畫英惠王像

岷山導江書禹貢。江流蹴山山爲動。嗚乎秦守信豪傑。千年遺迹人猶誦。決江一支溉數州。至今禾黍連

雲種孫翁下筆開生面。岌嶮高冠摩屋棟。徙木遺風雖峭刻。取材尙足當世用。寥寥後世豈乏人。尺寸未施讒已衆。要官無責空賦祿。軒蓋傳呼真一閔。奇勳偉績曠世無。仁人志士臨風慟。我遊故祠九頓首。夜遇神君了非夢。披雲激電從天來。赤手騎鯨不施鞿。

登灌口廟東大樓觀岬江雪山

我生不識柏梁建章之宮殿。安得峩冠侍遊宴。又不及身在滎陽京索間。擐甲橫戈夜酣戰。胸中迫隘思遠遊。泝江來倚岷山樓。千年雪嶺闌邊出。萬里雲濤坐上浮。禹迹茫茫始江漢。疏鑿功當九州半。丈夫生世要如此。齋志空死能無歎。白髮蕭條吹北風。手持卮酒酹江中。姓名未死終磊磊。要與此江東注海。

郫縣道中思故里

衰髮不勝簪。馳驅豈復堪。客魂迷劍外。歸思滿天南。江路灘聲壯。雲停雪意酣。空懷小叢碧。細酌破吳柑。

宿江原縣東十里張氏亭子未明而起

寸廩驅人卒歲勞。一官坐失布衣高。劍南十月霜猶薄。江上五更雞亂號。孤枕擁衾尋短夢。青燈照影著征袍。客愁相續無時斷。那得并州快剪刀。

戲詠西州風土

衍沃綿千里。融和被四時。蠶叢角歌吹。石室盛書詩。綠樹藏漁市。清江遶佛祠。吾行更堪樂。載酒上驀頤。

宿彭山縣通津驛大風鄰園多喬木終夜有聲

木欲靜。風不止。子欲養。親不留。夜誦此語涕莫收。吾親之沒今幾秋。尙疑捨我而遠遊。心翼乘雲反故丘。

再拜奉觴陳膳羞。陶盎治米聲叟叟。木甑炊麩香浮浮。芼薑屑桂調甘柔。稚鼈羹臠長魚臠。夜敷枕席視衾裯。晨起熏籠進衣裘。哀樂此志終莫酬。有言不聞九泉幽。北風歲晚號松楸。哀哉萬里爲食謀。

眉州郡燕大醉中間道馳出城宿石佛院

玻璃春作江水清。紫玉簫如雛鳳鳴。漏聲不聞看炮燭。俠氣未減欺飛觥。單車萬里信有數。二年三過寧忘情。斂頭玉茗妙天下。坐上見白山茶。格韻高絕瓊花一樹真虛名。酒酣忽作檀公策。問道絕出東關城。清歌未斷去已遠。回首樓堞空崢嶸。貂裘狐帽醉走馬。陌上應有行人驚。徑投野寺睡正美。魚鼓忽報江天明。

雙柏

雙柏屹相向。剛嚴如巨人。龍吟風雨夕。山立雪霜晨。閱世易成古。刳心不復春。扶顛要力量。歲晚莫全身。戍卒說沉黎。事有感。

亭障曾無閱。歲寧頻聞夷。落犯王靈狐。城月落冤魂。哭百里風吹戰血腥。瘴重厭看茅葉赤。春殘不放柳條青。焦頭爛額知何補。弭患從來貴未形。

平羌道中望峩眉山慨然有作

白雲如玉城。翠嶺出其上。異境忽墮前。心目久蕩漾。別來二百日。突兀喜亡恙。飛仙遙舉手。喚我一稅鞅。此行豈或使。屏迹事幽曠。何必故山歸。更破萬里浪。

次韻何元立都曹贈行元立用陳後山送蘇公詩韻

嘉榮東西川。此別不爲遠。徘徊凌雲寺。決去未遽忍。登高望故人。煙樹參差見。懸知今日夢。不隔重城鍵。平生相從意。百年有未滿。結巢青城雲。期子在歲晚。

次韻楊嘉父先輩贈行

貞元舊朝士。太學老諸生。半世不偶諧。殘年正飄零。危坐但愁悲。一笑黃河清。佳客如晨星。俗子如春萍。奇哉今日事。諸賢送東征。吸酒盃當空。綴詩筆勿停。明發復百憂。君聽馬蹄聲。

入榮州境

一起一伏黃茅岡。崔嵬破丘狐兔藏。炯炯寒日清無光。單單終日行羊腸。村落聚若如鷺鑿。亦有銀釵伏短牆。黃旗翻翻鼓其鐙。畫角嗚咽吹斜陽。長筒汲井熬雪霜。轆轤啞啞官道傍。渺然孤城天一方。傳者或云古夜郎。其民簡朴士甚良。千里鬱爲詩書鄉。閉閣掃地焚清香。老人處處是道場。

井研道中

窮冬景方促。下嶺路微平。地瘦竹無葉。風乾茅有聲。客遊空自入。歸計與誰評。尙喜長亭下。雲穿夕照明。

賴車鎮早行

孤燈照影聽初雞。攬轡情懷倍慘悽。雪作未成雲意鬧。茅荒無際客魂迷。觸寒手指藏猶裂。畏嶮圖書棄不攜。老去有文無賣處。等閑題遍蜀東西。

初到榮州

亂山缺處城樓呀。雙旗蕭蕭晚吹笳。煙深綠桂臨絕壑。霜落殘瀨鳴寒沙。廢臺已無隱士嘯。遺宅上有高



人家鈴齋下榻約僧話。松陰枕石放吏衙。盃羹最珍慈竹筍。餅水自養山薑花。地爐堆獸熾石炭。瓦鼎號  
蚓秋煎茶。少年遠遊無百里。一飢能使行天涯。豈惟慣見蓬婆雪。直恐遂泛星河槎。故巢肯作兒女戀。異  
境會向鄉閭誇。一盃徑醉幘自墮。燈下髮影看鬢髿。

城上

雙雙黃犢臥斜陽。葉葉丹楓著早霜。沙水自鳴如有恨。野花無主爲誰芳。郫筒味醲愁濡甲。巴曲聲悲怯  
斷腸。賴有生平管城子。不妨驅使答風光。

又

濯錦豪華夢不通。歸然孤壘亂山中。行歌滿道知人樂。露積連村見歲豐。萬瓦新霜掃殘瘴。一林丹葉換  
青楓。鵝黃名醞何由得。且醉盃中琥珀紅。榮州酒赤而勁。甚鵝黃。廣漢酒名。

西樓夕望

夜郎城裏歎途窮。賴有西樓著此翁。溪鳥孤飛寒靄外。野人參語夕陽中。蒼天可恃何曾老。白髮緣愁却  
未公。俗態十年看爛熟。不如留眼送歸鴻。

醉中懷眉山舊遊

勁酒少和氣。衰歌無歡情。故鄉不敢思。登高望錦城。錦城那得去。髣髴墓廬路。遙知尊前人。指我題詩處。  
我雖流落夜郎天。遇酒能狂似少年。想見東郊攜手日。海棠如雪柳飛綿。漢嘉術者袁牧童。謂予明年春  
分後。當還四州。

登城望西崦

登城望西崦。數家斜照中。柴荆晝亦閉。乃有太古風。慘淡起炊煙。寂歷下釣筒。土瘦麥苗短。霜重桑枝空。恐是種桃人。或有采芝翁。何當宿樓上。月明照夜春。

甲午十一月十三夜夢右臂踊出一小劍長八九寸有光既覺猶微痛也

少年學劍白猿翁。曾破浮生十歲功。玉具拄頤誰復許。蒯緱彈缺老猶窮。牀頭忽覺蛟龍吼。天上方驚牛斗空。此夢怪奇君記取。佩刀猶得世三公。

齋中夜坐有感

荒山爲城溪作壕。風鼓巨木聲翻濤。鳴鳧乘屋彈不去。狐狸欺人怒豎毛。雨來紅鶴更可惡。爭巢一似嬰兒號。城孤屋老草木茂。正坐人少此輩豪。急呼五百具畚鍤。欲掀窟穴窮腥臊。忽然語罷却自笑。殘年何至與汝慶。浣花江色綠如黛。春波灑灑浮輕舸。行當繫纜柳陰下。仰聽鶯語傾香醪。

晚登橫溪閣

樓鼓聲中日又斜。憑高愈覺在天涯。空桑客土生秋草。野渡虛舟集晚鴉。瘴霧不開連六詔。俚歌相答帶三巴。故鄉可望應添淚。莫恨雲山萬疊遮。

又

聲礪坡頭筇竹枝。西臨村路立多時。賣蔬市近還家早。煮井人忙下麥遲。榮多鹽井。秋冬收薪茅取急。病客情懷常怯酒。山城老景盡供詩。晚來試問愁多少。只許高樓橫笛吹。

昭德堂晚步

笑喚枯筇蹋夕陽。探春聊作靜中忙。高枝鵲語如相命。幽徑梅開祇自香。苔蝕斷碑驚世換。鐘來廢寺覺城荒。謫仙未必無遺恨。老欠題詩到夜郎。

龍洞在榮州東南一里許

峭崖磨天如立壁。枿根橫走松倒植。呀然一岫驚倒人。空洞坡陁三百尺。幽陰宜爲異物託。角爪痕存猶可識。想常蟠蟄未奮時。腥風逼人雲觸石。一朝偶爲旱歲起。卷海作雨飛霹靂。向來伊呂正如此。辛渭千年有遺迹。我欲酌酒招蜿蜒。安用辛苦常行天。太平海內多豐年。歸來故祠聽管絃。

客中夜寒戲作長謠

孤翁癡鈍如寒蠅。霜夕不眠愁嚴凝。寢衣觸體起芒粟。鼻息噓潤成冰凌。瑟瑟數嚴譙鼓。耿耿獨看幽窗燈。支牀龜老共夜永。號月雞冷同晨興。白狐紫貂了不暖。何況蜀錦并吳綾。靜思忽得安樂法。人生所欠絮與繒。十年一衲尙可過。不信請視匡山僧。

高齋小飲戲作

梅花又發鬼門關。坐覺春風萬里寬。荔子陰中時縱酒。竹枝聲裏彊追歡。丁年漢使殊方老。子夜吳歌昨夢殘。白帝夜郎俱不惡。兩公補處得憑欄。予五年間。自夔客榮。

太液黃鵠歌有引

漢始元元年春二月。黃鵠下建章宮太液池中。公卿上壽。賜諸侯王列侯宗室金錢。予夜讀漢

書追作歌一首

建章宮裏春風寒。太液水生池面寬。中人馳奏黃鵠下。龍旗豹尾臨池看。芹香藻暖鵝得意。左右從官呼萬歲。須臾傳詔宴公卿。驪聲如雷動天地。時平宮省遊樂多。黃鵠刷羽涵恩波。小臣珥筆龍墀下。願繼前朝天馬歌。

自唐安徙家來和義出城迎之馬上作

身如林下僧。處處常寄包。家如梁上燕。歲歲旋作巢。豈惟人所憐。頓影每自嘲。眼看佳山水。不得結把茅。造物困豪傑。如視餓虎哮。要令出精神。感激使叫喚。頗思投筆去。走馬盤雲旂。三更冒急雪。大戰梁楚郊。乙未元日除夕得制司檄催赴官。

五十人間老大身。更堪從此數新春。琴琴漏鼓催窗色。急急文書動驛塵。病後光陰常自惜。客中節物爲誰新。壯心只向郵亭盡。自揣頭顱莫問人。

別榮州正月十日

浮生歲歲俱如夢。一枕輕安亦可人。偶落山城無事處。暫還老子自由身。嘯臺載酒雲生屨。仙穴尋梅雨墊巾。便恐清遊從此少。錦城車馬漲紅塵。嘯臺在宮義門外一里。號孫登嘯臺。雙溪王氏有石穴。黃太史勝曰地仙洞。

聞仲高從兄計

去國萬里遊。發書三日哭。久矣吾已衰。衰哉公不淑。寄書墨未乾。玉立在我目。天高鬼神惡。生世露電速。

丹心抱忠貞。白首悲放逐。九閩不可叫。百身何由贖。文章果何罪。一斥獨不復。上壽阿母前。悔不早碌碌。夏日過摩訶池

烏帽翩翩白紵輕。摩訶海上試閑行。淙淙野水鳴空苑。寂歷斜陽下廢城。縱轡迎涼看馬影。袖鞭尋句聽蟬聲。白頭散吏元無事。却爲興亡一愴情。

早行

笮馬踐槐影。紗籠吹蠟香。憑鞭尋斷夢。側帽受微涼。病骨更疎放。衰懷罷激昂。道邊雙石筍。笑我伴人忙。天中節前三日大聖慈寺華嚴閣燃燈甚盛遊人過於元夕

萬瓦如鱗百尺梯。遙看突兀與雲齊。寶籬風定燈相射。綺陌塵香馬不嘶。星隕半空天宇靜。蓮生陸地客心迷。歸途細踏槐陰月。家在花行更向西。予官居在花行。距寺數里。

喜雨五月二十二日

黃塵赤日欲忘生。一夜新涼滿錦城。雨急驟增車轍水。泥深漸壯馬蹄聲。蚊蠅斂迹知無地。燈火於人頓有情。市遠雞豚不須問。小畦稀甲已堪烹。

夜聞浣花江聲甚壯

浣花之東當笮橋。奔流齧橋橋爲搖。分洪初疑兩蛟舞。觸石散作千珠跳。壯聲每挾雷雨橫。巨勢潛借鼉鼉驕。夢回聞之坐太息。鐵衣何日東征遼。銜枚度積沙。颯颯盤槩斷隴風。蕭蕭不然投檄徑歸去。短篷臥聽錢塘潮。

暑行憩新都驛

細細黃花落古槐。江臯不雨轉輕雷。長空烏破蒼煙去。落日人從綠野來。散策意行尋水石。脫巾高臥避氛埃。羈遊未羨端居樂。看月房湖又一回。

早發新都驛

喔喔江村雞。迢迢縣門漏。河漢縱復橫。繁星明如晝。愛涼趣上馬。未曉閱兩堠。高林起宿鳥。絕澗落驚犬。寺樓插蒼煙。沙泉瀉幽竇。我行忽萬里。坐歎關河溜。官如廣文冷。面作拾遺瘦。今年盍歸哉。勿落春雁後。謁諸葛丞相廟。彌牟八陳原上。

漢中四百年所命。老賊方持太阿柄。區區梁益豈足支。不忍安坐觀異姓。遺民亦知王室在。閭位那干天統正。公雖已沒有神靈。猶假賊手誅鍾鄧。前年我過沔陽祠。再拜奠俎衰淚迸。潔齋請作送迎詩。精忠大義神其聽。

自漢州之金堂過沈氏竹園小憩坐間微雨

修修萬竹壓康莊。碧玉椽圍一尺彊。雪節煙梢誰暇賞。馬蹄車轍可憐忙。帽邊忽墮吹香句。肘後舊傳醫俗方。更覺清遊天所惜。坐來飛雨度橫塘。

自小雲頂上雲頂寺

素衣雖成緇。不爲京路塵。躍馬上雲頂。欲呼飛仙人。飛仙不可呼。野僧意甚真。煎茶清樹下。童子拾墮薪。我少本疎放。一出但坐貧。縛袴屬囊鞬。哀哉水雲身。此地雖暫寓。失喜忘吟呻。故溪歸去來。歲晚思鱸蓴。

馬上微雨

三日觸毒暑。衣垢背汗浹。今日殊蕭然。涼雨吹醉頰。瘦松無橫枝。蠶竹少全葉。渚蓮乃可念。泣泣如放妾。豈惟人意適。我馬亦振鬣。遠村有歸人。清溪爭晚涉。

彌牟鎮驛舍小酌

郵亭草草置盤盂。買果煎蔬便有餘。自許白雲終醉死。不論黃紙有除書。角巾熱雨蟬聲外。細葛含風日落初。行遍天涯身尚健。却嫌陶令愛吾廬。

遊彌牟菩提院庭下有凌霄藤附古楠其高數丈花已零落滿地

絳英翠蔓亦佳哉。零亂空庭碼瑙盃。遍雨新花天有意。定知閑客欲閑來。佛經云。天風吹萎花。更雨新好者。

樓上醉歌

我遊四方不得意。陽狂施藥成都市。大瓢滿貯隨所求。聊爲疲民起憔悴。瓢空夜靜上高樓。買酒捲簾邀月醉。醉中拂劍光射月。往往悲歌獨流涕。剗却君山湘水平。斫却桂樹月更明。太白詩。剗却君山好。平鋪湘水流。老杜詩。斫却月中桂。清光應更多。丈夫有志苦難成。修名未立華髮生。

伏日獨遊城西

幕府重來老令威。山川良是昔人非。癡兒已遣了官事。伏日元知當早歸。避熱幽花房自斂。迎秋高樹葉先飛。論詩敢補先師處。僧拂江頭舊釣磯。

五鼓送客出城馬上作

夜漏餘十刻。涼颼如九秋。灘聲聒酒醒。月色照人愁。落魄悲孤宦。龍鍾怯遠遊。此生那可料。六歲劍南州。

寓舍書懷

借得茅齋近笮橋。羈懷病思兩無聊。春從豆蔻梢頭老。日向樽蒲齒上消。叢竹曉兼風力橫。高梧夜挾雨聲驕。書生莫倚身常健。未盡凌煙鬢已凋。

夜登城樓

天上何蒼蒼。四序浩旋斡。異哉今年熱。炊鬻不可活。夜分睡復起。搖筆腕欲脫。彊登城西樓。月露渺空闊。憑欄弄清影。涼颼入蕉葛。溼螢沾草根。驚鷓起木末。亦知難久留。襟袍資一豁。人事迭廢興。天理交予奪。羲和不停馭。去若弦上筈。此熱會當衰。歲晚備裘褐。

試茶

蒼爪初驚鷹脫鞵。得湯已見玉花浮。睡魔何止避三舍。歡伯直知輸一籌。日鑄焙香懷舊隱。谷簾試水憶西遊。銀餅銅碾俱官樣。恨欠纖纖爲捧甌。

成都大閱

千步毬場爽氣新。西山遙見碧嶙峋。令傳雪嶺蓬婆外。聲震秦川渭水濱。旗脚倚風時弄影。馬蹄經雨不霑塵。屬囊縛袴毋多恨。久矣儒冠誤此身。

書懷



萬里馳驅坐一飢。自憐無計脫塵鞿。身留幕府還家少。眼亂文書把酒稀。客路更逢秋色晚。故山空有夢魂歸。芋羹豆飯元堪飽。錯用人言恨子威。

遊大智寺

脫髮紛滿梳。衰顏不堪照。百年忽已半。去日如過燒。平生功名心。上馬無燕趙。爾來閱世故。萬事驚錯料。豈無舊朋儔。聯翩半廊廟。誰能伴此老。泝峽聽猿叫。錦城得數公。意氣如再少。偷閑訪野寺。繫馬追一笑。新糟厭玉狸。畏酒亦復釀。古股颯颯家。壞壁冠佩肖。摩挲宋公詩。句法歎高妙。正如霓裳曲。零落得遺調。歸途繚長堤。掠面霜氣峭。佳遊不可忘。落筆君勿誚。

看月睡晚戲作

香火課夙興。風月留晚睡。直言散吏閑。亦未盡無事。舊聞雲臺翁。高枕閱塵世。至今青嶂間。鼻息亂松吹。平生寡嗜好。所願究此味。千年一欠伸。笑看巖花墜。

成都書事

劍南山水盡清暉。濯錦江邊天下稀。煙柳不遮樓角斷。風花時傍馬頭飛。芼羹筍似稽山美。斫脰魚如笠澤肥。客報城西有園賈。老夫白首欲忘歸。

又

大城少城柳已青。東臺西臺雪正晴。鶯花又作新年夢。絲竹常聞靜夜聲。廢苑煙蕪迎馬動。清江春漲拍堤平。尊中酒滿身彊健。未恨飄零過此生。

雙溪道中

曉山笮橋門。天低日未暝。綠波寒淡淡。白霧遠昏昏。古路亂車轍。行人驚雁羣。征塗不須厭。蓬轉本無根。

牛飲市中小飲呈坐客

牛飲橋頭小市東。店門繫馬一尊同。已能自置功名外。尙欲相期意氣中。褐擁紫茸迎曉日。酒翻紅浪醉春風。從今共約無疎索。竹外梅花欲惱公。

自警

乳烹佛粥遽如許。菜簇春盤行及時。草木欣欣渠得意。乾坤浩浩我何私。懷材所忌多輕用。學道當從不自欺。且暮置規君勿怪。修身三省自先師。

午寢

眼澀朦朧不自支。欠伸常恨到牀遲。庭花著雨晴方見。野客敲門去始知。灰冷香煙無復在。湯成茶椀徑須持。頽然却自嫌疏放。旋了生涯一首詩。

白髮

我生實多遭。九折行晚途。憂傷日熏心。驚見頰與顙。稍生秋風時。競出寒雨餘。星星初尙稀。皦皦不可除。昔如春柳妍。今作霜蓬枯。蓬枯有再綠。念我豈得如。平昔樂方外。固與功名疏。投鐻三歎息。金丹豈無書。

明日午睡至莫復次前韻

酒力醺然入四支。華胥稅駕不應遲。殘年已覺衰難彊。萬事無如睡不知。幸有琴書供枕藉。安能冠帶更

支持紅爐過盡灰如雪。獨守青燈坐畫詩。

醉中長歌

闌干斗柄搖天東。人間一夜回春風。注桃染柳歲相似。惟我衰顏非昔紅。可憐逢春不自感。更欲使氣驚兒童。煙郊射雉錦臆碎。水亭供鮪金盤空。歸穿南市萬人看。流星突過連錢驄。高樓作歌醉自寫。墨光燭焰交長虹。人生未死貴適意。萬里作客元非窮。故人夜直金鑾殿。僵臥獨聽宮門鐘。

對酒

扇邊生怕庾公塵。索笑來遊錦水濱。四野雲齊初釀雪。一枝梅動已催春。綠尊有味能消日。白髮無情不貸人。商略此生何所恨。太平時得自由身。

人日飲昭覺

天涯羈旅逢人日。病起消搖集寶坊。雪水初融錦江漲。梅花半落綠苔香。家山松桂年年長。幕府文書日日忙。自笑餘生有幾許。一菴借與得深藏。

上元前一日

異縣客遊久。今年春事遲。峭寒增酒價。微雨惱燈期。老態人未覺。孤愁心自知。停車呼病婦。彊出伴諸兒。

上元

細細香塵暗六街。魚鱗淺碧暮雲開。新粧褰幕全身見。誤馬隨車一笑回。酒醺頓忘風力峭。夜長猶恨漏聲催。京華舊侶彫零盡。短髮成絲心未灰。

又

病起衰顏非昔紅。偷閑聊與少年同。一規寒玉挂樓角。千點華星來坐中。久戍遺民雖困弊。承平舊鎮尚繁雄。歸時瘦馬崔嵬影。定有遊人笑此翁。

喜譚德稱歸

少鄙章句學。所慕在經世。諸公薦文章。頗恨非素志。一朝落江湖。爛熳得自恣。討論極王霸。事業窺莘渭。孔明景略間。却立頗眈眈。從人無一欣。對食有三咽。譚侯信豪雋。可共不朽事。天涯再相見。握手更投淚。欲尋西郊路。斗酒傾意氣。浩歌君和我。勿作尋常醉。

春感

少時狂走西復東。銀鞍駿馬馳如風。眼看春去不復惜。只道歲月來無窮。初遊漢中亦未覺。一飲尙可傾千鍾。又魚浪藉漾水濁。獵虎蹴蹋南山空。射棚命中萬人看。毬門對植雙旗紅。華堂却來弄筆硯。新詩醉草誇坐中。劍關南山纔幾日。壯氣摧縮成衰翁。雪霜蕭颯已滿鬢。蛟龍鬱屈空蟠胸。鄰園杏花忽爛熳。推枕彊起隨遊蜂。遙看百匝幾歎息。吹紅洗綠行怱怱。暮年逢春尙有幾。常恐春去尋無踪。青錢三百幸可辦。且判爛醉酤郵筒。

春晴暄甚遊西市施家園

稅駕名園半日留。遊絲飛蝶晚悠悠。驟暄不爲海棠計。長晝只添鸚鵡愁。老去自驚詩酒減。客中偏覺歲時遒。東風好爲吹歸夢。著我松江弄釣舟。

花時遍遊諸家園

看花南陌復東阡。曉露初乾日正妍。走馬碧雞坊裏去。市人喚作海棠顛。

又

爲愛名花抵死狂。只愁風日損紅芳。綠章夜奏通明殿。乞借春陰護海棠。

又

翩翩馬上帽簷斜。盡日尋春不到家。偏愛張園好風景。半天高柳臥溪花。

又

花陰掃地置清尊。爛醉歸時夜已分。欲睡未成欹倦枕。輪囷帳底見紅雲。

又

宣華無樹著啼鶯。惟有摩訶春水生。故老能言當日事。直將宮錦裹宮城。

又

枝上猩猩血未晞。尊前紅袖醉成圍。應須直到三更看。畫燭如椽爲發輝。

又

重萼丹砂品最高。可憐寂寞棄蓬蒿。會當車載金錢去。買取春歸亦足豪。小東門外有千葉朱砂海棠一株。奇麗絕代。在荒園中。人罕見者。

又

絲絲紅萼弄春柔。不似疎梅只慣愁。常恐夜寒花索寞。錦茵銀燭按涼州。

又

飛花盡逐五更風。不照先生社酒中。輸與新來雙燕子。啣泥猶得帶殘紅。今年二月二日社。而海棠已過。

又

海棠已過不成春。絲竹淒涼鎖暗塵。眼看燕脂吹作雪。不須零落始愁人。

曉過萬里橋

曉出錦江邊。長橋柳帶煙。豪華行樂地。芳潤養花天。擁路看欷帽。窺門笑墜鞭。京華歸未得。聊此送流年。

自合江亭涉江至趙園

政爲梅花憶兩京。海棠又滿錦官城。鴉藏高柳陰初密。馬涉清江水未生。風掠春衫驚小冷。酒潮玉頰見微頰。殘年飄泊無時了。腸斷樓頭畫角聲。

春晴

一庭舞絮鬪身輕。百尺遊絲弄午晴。靜喜香煙縈曲几。臥驚玉子落紋枰。新春易失遽如許。薄宦忘歸何似生。安得一船東下峽。江南江北聽鶯聲。

卷第七

題明皇幸蜀圖

天寶政事何披猖。使典相國胡奴王。弄權楊李不足怪。阿瞞手自裂紀綱。八姨富貴尙有理。何至詔書褒五郎。天寶末。下詔雪張易之兄弟。盧龍賊騎已洶洶。丹鳳神語猶琅琅。人知大勢危纍卵。天稔奇禍如崩牆。臺省諸公獨耐事。歌詠功德卑虞唐。一朝殺氣橫天末。疋馬西奔幾不脫。向來諂子知幾人。賊前稱臣草間活。劍南萬里望秦天。行殿春寒聞杜鵑。老臣九齡不可作。魚蠹蛛絲金鑑篇。

春寒連日不出

海棠花入燕泥乾。梅子枝頭已帶酸。老去嬾尋年少夢。春分不減社前寒。著書敢望垂千載。嗜酒猶須隱一官。正是閑時無客過。小庭斜日倚闌干。

馬上偶成

城南城北紫遊韉。盡日閑行看似忙。刺水離離葛葉短。連村漠漠豆花香。夕陽有信催殘角。春草無情上繚牆。我亦人間倦遊者。長吟聊復愴興亡。

夜宴

酒浪搖春不受寒。燭花垂燼忽堆盤。山川路遠人將老。絲管聲遒夜向闌。四海交朋更聚散。百年光景雜悲歡。自憐病眼猶明在。更把名花半醉看。是夕得范希元家晚海棠數枝。繁麗一城所無。

觀音院讀壁間蘇在廷少卿兩小詩次韻

揚鞭暮出錦官城。小院無僧有月明。不信道人心似鐵。隔城猶送擣衣聲。

又

老去癡頑不受鐫。姓名身後更須傳。世間商略無歸處。只合長齋繡佛前。

錦亭

天公爲我齒頰計。遣飫黃甘與丹荔。又憐狂眼老更狂。令看廣陵芍藥蜀海棠。周行萬里逐所樂。天公於我元不薄。貴人不出長安城。寶帶華纓眞汝縛。樂哉今從石湖公。大度不計豐丞豐。夜宴新亭海棠底。紅雲倒吸玻璃鍾。琵琶絃繁腰鼓急。盤鳳舞衫香霧溼。春醪凸盡燭光搖。素月中天花影立。遊人如雲環玉帳。詩未落紙先傳唱。此邦句律方一新。鳳閣舍人今有樣。

晚起

新晴窗日弄春妍。幌小屏深意自便。長恨病多妨痛飲。却緣客少得安眠。雛鶯故故啼簷角。飛絮翩翩墮枕前。欲著衣裳還嬾起。重尋殘夢一悠然。

雨

映空初作繭絲微。掠地俄成箭鏃飛。紙帳光遲饒曉夢。銅鑪香潤覆春衣。池魚鱗鱗隨溝出。梁燕翩翩接翅歸。惟有落花吹不去。數枝紅溼自相依。

春晚書懷

萬里西遊爲覓詩。錦城更付一官癡。脫巾漉酒從人笑。拄笏看山頗自奇。疎雨池塘魚避釣。曉鶯窗戶客爭基。老來怕與春爲別。醉過殘紅滿地時。

出朝天門繚長堤至劉侍郎廟由小西門歸



曉從北郭過西城。十里沙堤似席平。澹日向人供帽影。微風傍馬助鞭聲。歡情寂寂隨年減。俗事紛紛逐日生。到處每求佳水竹。晚途牢落念歸耕。

夜分讀書有感

光陰百歲已中分。擬結茅茨老白雲。萬里誰憐新臥疾。九重猶記舊能文。枕邊得句題屏疊。馬上看山隔帽簷。終恨無勞糜廩粟。夜窗聊策讀書勳。

中夜聞大雷雨

雷車駕雨龍盡起。電行半空如狂矢。中原腥羶五十年。上帝震怒初一洗。黃頭女真褫魂魄。面縛軍門爭請死。已聞三箭定天山。何帝積甲齊熊耳。捷書馳騎奏行宮。近臣上壽天顏喜。閣門明日催賀班。雲集千官摩劍履。長安父老請移蹕。願見六龍臨渭水。從今身是太平人。敢憚安西九千里。

春殘

石鏡山前送落暉。春殘回首倍依依。時平壯士無功老。鄉遠征人有夢歸。苜蓿苗侵官道合。蕪菁花入麥畦稀。倦遊自笑摧頽甚。誰記飛鷹醉打圍。

武擔東臺晚望

顛顛西窗已一翁。登高意氣尙豪雄。關河霸國興亡後。風月詩人醉醒中。病起頓驚雙鬢改。春歸一掃萬花空。欄邊徙倚君知否。直到吳天目未窮。

行武擔西南村落有感

騎馬悠然欲斷魂。春愁滿眼與誰論。市朝遷變歸蕪沒。礪谷訶訶互吐吞。一徑松楠遙見寺。數家雞犬自成村。最憐高家臨官道。細細煙莎遍燒痕。有大家高數丈。旁又一冢差小。莫知何代人也。俗號太子墓。

小飲房園

宦遊到處卽忘家。況得閑身管物華。疎索故人緣病酒。折除厚祿爲看花。泥新高棟初巢燕。萍匝荒池已集蛙。斟酌人生要行樂。燈前起舞落烏紗。

飯昭覺寺抵暮乃歸

身墮黃塵每慨然。攜兒蕭散亦前緣。聊憑方外巾盂淨。一洗人間七箸羶。靜院春風傳浴鼓。畫廊晚雨溼茶煙。潛光寮裏明窗下。借我消搖過十年。

自芳華樓過瑤林莊

春晚江邊草過腰。雨餘樓下水平橋。名花未落如相待。佳客能來不費招。欄角峭風羅袖薄。柳陰斜日玉驄驕。此身醉死元關命。敢笑聞雞趁早朝。

書懷

詩不能工浪得窮。幾年袞袞看諸公。摧頰已作驢伏櫪。留滯敢嫌船逆風。消日劇棋疎竹下。送春爛醉亂花中。倚樓看鏡俱癡絕。嬴取煙蓑伴釣翁。

遊東郭趙氏園

清晨呼馬出。馭吏請所之。錦城浩如海。我亦無與期。有花卽入門。莫問主人誰。下馬據胡牀。傲睨忘訶譏。

人言白頭翁。胡爲尙兒癡。老翁故不癡。借花發吾詩。詩句帶花香。東風不敢吹。徘徊雙蝶蝶。許汝鼻端知。

卜居

歷盡人間行路難。老來要覓數年閑。供家米少因添鶴。買宅錢多爲見山。池面紋生風細細。花根土潤雨斑斑。借春乞火依鄰里。剩釀村醪約往還。

又

南浮七澤弔沉湘。西泝三巴掠夜郎。自信前緣與人薄。每求寬地寄吾狂。雪山水作中瀟味。蒙頂茶如正焙香。儻有把茅端可老。不須辛苦念還鄉。

馬上

春殘馬上意悵悵。縱轡微吟過數坊。綠樹成帷連藥市。清流如帶繞毬場。城荒鼓角增悲壯。苑廢雲煙尙莽蒼。堪笑年來向詩嬾。還家古錦只空囊。

夜登江樓

平生胸中無滯留。曠然獨與造物遊。天風駕我周寓縣。夜半忽過江邊樓。樓前茫茫天地闊。萬頃月浸空江秋。雲階無塵鸞鶴舞。玉笛裂石魚龍愁。肺肝澄澈納灑氣。毛髮慘慄臨寒流。世間回首真一夢。誰能更念酬恩讎。

書歎

早得虛名翰墨林。謝歸忽已歲時侵。春郊射雉朝盤馬。秋院焚香夜弄琴。病酒閉門常兀兀。哦詩袖手久

情情浮沉不是忘經世。後有仁人識此心。

三月一日府宴學射山

北出昇仙路少東。據鞍自笑老從戎。百年身世酣歌裏。千古功名感慨中。天遠僅分山髣髴。霧收初見日曛曛。橫空我欲江湖去。誰借冷然禦寇風。

對酒

閑愁如飛雪。入酒卽消融。好花如故人。一笑盃自空。流鶯有情亦念我。柳邊盡日啼春風。長安不到十四載。酒徒往往成衰翁。九環寶帶光照地。不如留君雙頰紅。

題直舍壁

文書那得廢哦詩。羞作羣兒了事癡。付與後人評此老。一丘一壑過元規。

遊園覺乾明祥符三院至暮

成都再見春事殘。雖名閑官實不閑。門前車馬鬧如市。案上文檄高於山。有時投罇輒徑出。略似齊客偷秦關。日斜僕夫已整駕。顧景欲欲愁嘲訕。豈知今朝有此樂。放浪一笑開衰顏。抽身黃塵烏帽底。得意翠木清泉間。寒裳危磴窮犖确。洗耳古澗聽淙潺。豈惟頓覺宇宙廣。政爾一散腰脚頑。似聞青城縹緲處。待我歸綴仙官班。俊鷹解條卽萬里。豈比倦翼方知還。

遊合江園戲題

朱朱白白池臺間。好風妍日開未殘。我來覓醉苦草草。常恨不如花意閑。山雞飛起亂花落。下上青林穿

翠壑世間動步卽有拘。常恨不如禽意樂。人言功名恐不免。我願徜徉娛歲晚。熟計淫書理白魚。何如縱獵牽黃犬。成都四郊如砥平。安得雙韃馳出城。鞚飛塵起望不見。從騎尋我鳴鶻聲。

三月十六日作

石筍街西風景幽。醉眠萬事付悠悠。倦遊我已七年客。促駕春無三日留。枝上蝶稀紅藥老。舍中蠶起綠桑柔。功名墮甑誰能問。羞作飢鷹夜掣鞲。

食齋

日日思蹄飽蕨薇。春來齋美忽忘歸。傳誇真欲嫌茶苦。自笑何時得瓠肥。

又

采采珍蔬不待畦。中原正味壓葶絲。挑根擇葉無虛日。直到開花如雪時。

又

小著鹽醃助滋味。微加薑桂發精神。風爐歛鉢窮家活。妙訣何曾肯授人。

次韻范文淵

簞瓢氣已壓膏粱。不傍朱門味更長。細看高人忘寵辱。始知吾輩可憐傷。巖扃勾漏新丹竈。香火匡廬古道場。剩欲與君堅此約。它年八十鬢眉蒼。近有術者言僕壽過八十。

題醉中所作草書卷後

胸中磊落藏五兵。欲試無路空崢嶸。酒爲旗鼓筆刀槊。勢從天落銀河傾。端溪石池濃作墨。燭光相射飛

縱橫須臾收卷復把酒。如見萬里煙塵清。丈夫身在要有立。逆虜運盡行當平。何時夜出五原塞。不聞人語聞鞭聲。

登子城新樓。遍至西園池亭。

狂夫無計奈狂何。何況登臨逸興多。千疊雪山連滴博。一支春水入摩訶。吟餘騎省霜侵鬢。釣罷玄真雨滿蓑。遂虜榆關期尙遠。不妨隨處得婆娑。

小疾謝客

小疾深居不喚醫。消搖更覺勝平時。癡人未害看周易。名士真須讀楚辭。綠徑風斜花片片。畫廊人靜雨絲絲。晚來頓覺清羸甚。自置篝爐煮粟糜。

歸耕

隨牒人間鬢欲疎。歸耕且復補東隅。餓炊地確新春米。衣拆天吳舊繡圖。有圃免煩官送菜。叩門翻喜吏徵租。不愁問字無來客。惟欠揚雄宅一區。

聞孫巖老挂冠歎仰之餘。輒賦長句。

聖賢在世龍行天。出處何至爲物牽。後人競作駒伏轅。未死奄奄如九泉。鄆孫公者山澤仙。嶠巖玉骨寒入肩。哦詩調苦亂擘蟬。燥墨瘦字醜不妍。諸公好之挽使前。六丁力盡山嶷然。奏書告老不待年。脫手徑上岷山巔。吾儕一官自糾纏。俛首鞭箠不自憐。彊欲作詩誦公賢。事偉辭卑難並傳。

松驥行

驥行千里亦何得。垂首伏櫪終自傷。松閱千年棄澗壑。不如殺身扶明堂。士生抱材願少試。誓取燕趙歸。君王閉門高臥身。欲老聞雞相蹴涕。數行正令啾嚶死牀簀。豈若橫身當戰場。半酣浩歌聲激烈。車輪百轉盤愁腸。

### 遣興

鶴料無多又掃空。今年真是浣花翁。放教綠酒關身事。留得朱顏在鏡中。挾彈園林芳徑雨。投竿窗檻小溪風。癡頑自笑歸何日。家在東吳更向東。

### 野意

小東門外曳筇枝。白葛烏紗自一奇。閑客逍遙無吏責。茂陰清潤勝花時。茶經每向僧窗讀。菰米仍於野艇炊。便覺眼邊歸路近。鏡湖禹廟見參差。

### 雨中登安福寺塔俗謂之黑塔

平生喜登高。醉眼無疆界。北顧極幽并。東望跨海岱。喟然撫手歎。從古幾成敗。英雄如過鳥。城郭但遺塊。今朝上黑塔。千里曠無礙。忽驚風霆掣。坐覺天地晦。急雨挾龍腥。溽暑爲摧壞。皇天念蟠鬱。令我寄一快。那知書生狂。自倚心眼大。更思駐潼關。黃河看如帶。

### 過野人家有感

縱櫂江臯送夕暉。誰家井臼映荆扉。隔籬犬吠窺人過。滿箔蠶飢待葉歸。吳人直謂桑日業。世態十年看爛熟。家山萬里夢依稀。躬耕本是英雄事。老死南陽未必非。

幽居晚興

借鉏斲藥喜微香。汲井澆花趁晚涼。胸次何曾橫一物。尊前尙欲笑千場。錦江秋雨芙蓉老。笠澤春風杜若芳。歸去自佳留亦樂。夢中何處是吾鄉。

飯保福

筵雨雲低未放晴。閉門作病憶閑行。攝衣丈室參耆宿。曳杖長廊喚弟兄。飽飯卽知吾事了。免官初覺此身輕。歸來更欲誇妻子。學煮雲堂芋糝羹。

觀華嚴閣僧齋閣下自四月初至七月末日飯僧數千人

拂劍當年氣吐虹。暗鳴坐覺朔庭空。早知壯志成癡絕。悔不藏名萬衲中。

閑中偶題

楚澤巴山歲歲忙。今年睡足向禪房。只知閑味如茶永。不放羈愁似草長。架上漢書那復看。牀頭周易亦相忘。客來拈起清談麈。且破西窗半篆香。

又

久矣雲衢斂羽翰。退飛更覺一枝安。七千里外新閑客。十五年前舊史官。花底清歌春載酒。江邊明月夜投竿。癡頑直爲多更事。莫怪胸懷抵死寬。

病中戲書

五十忽過二流年。消壯心。避人便小疾。移竹喜微陰。洗甕閑瀉酒。焚香靜斲琴。鏡中青鬢在。切莫遣愁侵。



又  
微疾餒餘災。時須藥裏開。禽驚杵聲去。蜂認蜜香來。閉戶知長日。全生幸散材。晚涼幽興動。彌到竹邊回。

又  
食笏動衰疾。清羸逾兩旬。藥囊隨臥起。詩句雜吟呻。架足書籤蠹。窗凝酒榼塵。免從官乞假。且喜是閑身。

病起書懷

病骨支離紗帽寬。孤臣萬里客江干。位卑未敢忘憂國。事定猶須待闔棺。天地神靈扶廟社。京華父老望和鑾。出師一表通今古。夜半挑燈更細看。

又

酒酣看劍凜生風。身是天涯一秃翁。捫蝨劇談空自許。聞雞浩歎與誰同。玉關歲晚無來使。沙苑春生有去鴻。人壽定非金石永。可令虛死蜀山中。

寺樓月夜醉中戲作

素壁徐升天宇閑。連峯積雪蒼茫間。樓臺是處可見月。無此巉巖羣玉山。

又

水精盞映碧琳腴。月下泠泠看似無。此酒定從何處得。判知不是文君壺。

又

海山縹緲玉真妃。貪看冰輪不肯歸。樓上三更風露冷。旋圍步障換羅衣。

晚過五門

五門路四月乳鴉啼綠樹。閑遊但喜日初長。薄暑始知春已去。樓頭風高舞雙旗。畫角聲中日還暮。馬蹄特特無斷時。老盡行人路如故。

躬耕

莫笑躬耕老蜀山。也勝菜把仰園官。喚回癡夢塵機息。空盡閑愁酒地寬。無復短衣隨李廣。但思微雨過蘇端。十年世事茫如海。輸與閑人靜處看。

晚興

老病愁趨畫戟門。天教高臥浣花村。山林獨往雜屠釣。世界皆空誰怨恩。禪祕要經言觀空之法。自一城一國一世界。至三千大千世界皆空。千卷蠹書忘歲月。一尊濁酒信乾坤。興來倚杖清江上。斷角疎鐘正斂昏。

夏夜大醉醒後有感

少時酒隱東海濱。結交盡是英豪人。龍泉三尺動牛斗。陰符一編役鬼神。客遊山南夜望氣。頗謂王師當入秦。欲傾天上河漢水。淨洗關中胡虜塵。那知一旦事大繆。騎驢劍閣霜毛新。卻將覆甃草檄手。小詩點綴西州春。素心雖願老巖壑。大義未敢忘君臣。雞鳴酒解不成寐。起坐肝膽空輪囷。

合江夜宴歸馬上作

零露中宵溼綠苔。江郊縱飲亦荒哉。引盃快似黃河瀉。落筆聲如白雨來。纖指醉聽箏柱促。長檠時看燭

花摧頭顱自揣應虛死。馬上長歌寄此哀。

齋居書事

慵養金丹換鬢鬚。微霜正要稱清灑。平生風露充蟬腹。到處雲山寄鶴軀。道室焚香勤守白。虛窗點易靜研朱。自知世事難諧偶。不待幽人夜見呼。

午夢

苦愛幽窗午夢長。此中與世暫相忘。華山處士如容見。不覓仙方覓睡方。

江濱池納涼

雨過荒池藻荇香。月明如水浸胡牀。天公作意憐羈客。乞與今年一夏涼。

晚步

屏居無俗事。薄暮行溪園。斷續風蟬噪。俯仰露葉翻。月出照西壁。參差見簷痕。新沐嬾不櫛。清冷入髮根。臨流揮羽扇。對月傾芳尊。寄謝南昌尉。何必隱市門。

姚將軍靖康初以戰敗亡命建炎中下詔求之不可得後五十年乃從呂洞賓劉高尙往來名山有見之者予感其事作詩寄題青城山上清宮壁間將軍儻見之乎

造物困豪傑。意將使有爲。功名未足言。或作出世資。姚公勇冠軍。百戰起西陲。天方覆中原。殆非一木支。脫身五十年。世人識公誰。但驚山澤間。有此熊豹姿。我亦志方外。白頭未逢師。年來幸廢放。儻遂與世辭。從公遊五嶽。稽首餐靈芝。金骨換綠髓。歛然松杪飛。

客自鳳州來言岐雍間事悵然有感

表裏山河古帝京。逆胡數盡固當平。千門未報甘泉火。萬耦方觀渭上耕。前日已傳天狗墮。去年十一月天狗墮長安聲甚大。今年寧許佛狸生。會須一洗儒酸態。獵罷南山夜下營。

席上作

綠波畫漿浣花船。清簾簾角黍筵。一幅葛巾林下客。百壺春酒飲中仙。散懷絲管繁華地。寄傲江湖浩蕩天。浮世升沉何足計。丹成碧落珥貂蟬。青城山中有孫太古畫碧落侍中范長生舉手整貂蟬像特妙。

水亭偶題

涼榭閑拈玉笛吹。十年疎放負明時。溝中木斷誰曾問。空裏蓬征自不知。金井梧桐生晝寂。綠池蘋藻弄風漪。人生行樂從來事。此理何須更細推。

避暑江上

苦熱厭城市。初夜臨江湍。風從西山來。頗帶積雪寒。堰聲靜尤壯。噴薄如急灘。頓遠車馬喧。更覺衣裳單。斷岸吐缺月。恨不三更看。且隨螢火歸。城扉欲橫關。

夏白紵并序

古有四時白紵。亦有止作一時者。丙申五月在成都。烈暑可畏。戲作夏白紵二首。

雲母屏薄望如空。水精簾疎不礙風。美人獨立何所似。白玉芙蓉秋水中。素綃細織冰蠶縷。清寒不受人間暑。晚來浴罷綠窗閑。自把新詩教鸚鵡。

又

翔鸞矯矯離風塵。眼明見此絕代人。紗窗弄筆消永日。臨得黃庭新逼真。飛樓縹緲今何夕。月與玉人同一色。下簾不爲九霄寒。自要玲瓏看團壁。

久旱忽大雨涼甚小飲醉眠覺而有作

暑雨蕭蕭滴夜長。曉窗探借九秋涼。金荷淺酌閑傳酒。銀葉無煙靜炷香。舒雁且爲賒死計。鳴鳩便欲策勳忙。散人亦未全無事。枕藉琴書滿一牀。

明日開霽益涼復得長句

睡起東窗照眼明。朝陽爛熳作新晴。已聞雨斷空階滴。更覺風從細葛生。蛺蝶飛來停酒榼。石榴飄落糝棋枰。四時好處閑方覺。不枉今年住錦城。

夜讀東京記

海東小胡辜覆冒。敢據神州竊名號。幅員萬里宋乾坤。五十一年讎未報。煌煌藝祖中天業。東都實宅神明隴。卽今犬豕穴宮殿。安得旄頭下除掃。寶玉大弓久不獲。臣子義敢忘巨盜。景靈太廟威神在。北鄉慟哭猶可告。壯士方當棄軀命。書生詎忍開和好。孤臣白首困西南。有志不伸空自悼。

感事

青鬢當時映綠衣。堯功曾預記巍巍。玄都春老人何在。華表天高鶴未歸。流輩凋疎情話少。年光遲暮壯心違。倚樓不用悲身世。倦鷁無風亦退飛。

書歎

三代藏寶器。世守參河圖。埋湮則已矣。可使列市區。文章有廢興。蓋與治亂符。慶曆嘉祐間。和氣扇大鑪。數公實主盟。渾灑配典謨。開闢始歐王。奮奮逮曾蘇。大駕初渡江。中原皆避胡。吾猶及故老。清夜陪坐隅。論文有脈絡。千古著不誣。俯仰四十年。綠髮霜蓬枯。孤生尊所聞。秉節不敢渝。久幽士固有。速售理則無。世方亂珉玉。吾其老江湖。

睡起

睡味清酣鼻息輕。碧幮文簟喜涼生。片雲過處失簾影。急雨來時聞瓦聲。索虜尙憑三輔險。散關未下九天兵。白頭漫倚詩豪在。手掣鯨魚意未平。

飯罷碾茶戲書

江風吹雨暗衡門。手碾新茶破睡昏。小餅戲龍供玉食。今年也到浣花村。

夢遊山水奇麗處有古宮觀云雲臺觀也

神遊忽到雲臺宮。太華彩翠明秋空。曲廊下闕白蓮沼。小閣正對青蘿峯。林間突兀見古碣。雲外縹緲聞疎鐘。褐衣紗帽瘦如削。遺像恐是希夷翁。窮搜未遍忽驚覺。半窗朝日初曛曛。卻思巉然五千仞。可使常墮胡塵中。小臣昧死露肝鬲。願扈鑾駕臨崑潼。何當真過此山下。百尺嫋嫋龍旗風。

月下醉題

黃鸝飛鳴未免飢。此身自笑欲何之。閉門種菜英雄老。彈鋏思魚富貴遲。生擬入山隨李廣。死當穿冢近

要離一樽彊醉南樓月。感慨長吟恐過悲。

野外劇飲示坐中

悲歌流涕遣誰聽。酒隱人間已半生。但恨見疑非節俠。豈忘小忍就功名。江湖舟楫行安往。燕趙風塵久未平。飲罷別君攜劍起。試橫雲海翦長鯨。

與青城道人飲酒作

君不見太傅晚歲具海舟。歸欲極意東山遊。翰林偶脫夜郎譴。大醉賦詩黃鶴樓。兩公窮達何足道。同是逸氣橫清秋。我無一事行萬里。青山白雲聊散愁。有酒不換西涼州。無酒不典鸕鷀裘。不作王猛傲睨坐。捫蝨不作寧戚悲歌起飯牛。五雲覆鼎金丹熟。笙鶴飄然戲十洲。

銅壺閣望月

銅壺閣上看明月。身在千尋白銀闕。十年肺渴今夕平。皓然胸次堆冰雪。恨無仙掌出雲表。更取墜露和玉屑。夜闌三歎下危梯。明日人間火雲熱。

連日得雨涼甚有作

九淵龍起跨蒼茫。聊爲西州洗亢陽。曉看空濛知歲稔。夜聞點滴覺心涼。紗幮不下蚊蠅靜。焙火微溫書晝香。睡足何須雲夢澤。如雷鼻息撼鄰牆。

待青城道人不至

我亦從來薄世緣。偶然采藥到西川。慵追萬里騎鯨客。且伴千年化鶴仙。金鼎養丹曠海日。玉壺取酒醉

江天朝來坐待方平久。讀盡黃庭內外篇。

劍客行

我友劍俠非常人。袖中青蛇生細鱗。騰空頃刻已千里。手決風雲驚鬼神。荆軻專諸何足數。正晝入燕誅逆虜。一身獨報萬國讎。歸告昌陵淚如雨。

夜宴卽席作

宣華輦路牧羊。摩訶龍池草茫茫。宮殿碧盡餘繚牆。南風遠吹禾黍香。草間白骨橫秋霜。何由喚起鬪一觴。癡人走死聲利場。我獨感此惜流光。蘋花開時風榭涼。美人縹緲如鸞翔。堯年舜日樂未央。非子之故爲誰狂。

宿沱江彌勒院

雨足陂塘溢。庭空草樹荒。衰年愁客路。野寺憩衣囊。蛙吹喧孤枕。蚊雷動四廊。青燈照無寐。寂寞數更長。

學射道中感事

學射山前宿雨收。籃輿吟軋自生愁。得閑何惜傾家釀。漸老真須秉燭遊。道廢尙書猶乞米。時來校尉亦封侯。自憐白首能豪在。車轍何因遍九州。

遊學射觀次壁間詩韻

走遍人間鬢尙青。爾來樂事滿餘齡。傍潭秋爽鋤甘菊。登嶽春暄采茯苓。閑倚松蘿論劍術。靜臨窗几勘丹經。嚴光本是逃名者。安用天文訪客星。



昇仙橋遇風雨大至憩小店

觸熱真疑墮火灰。雨如飛鏃亦佳哉。空江魚鼈從龍起。平野雷霆擁馬來。正怪橫吹屋茅盡。俄聞下擊澗松摧。晚來日漏風猶急。臥看柴扉闔復開。

龍挂

成都六月天。大風發屋動地聲。勢雄黑雲崔嵬行風中。凜如鬼神塞虛空。霹靂迸火射地紅。上帝有命起伏龍。龍尾不卷曳天東。壯哉雨點車軸同。山摧江溢路不通。連根拔出千尺松。未言爲人作年豐。偉觀一洗芥蒂胸。

芳華樓夜宴

射虎將軍老不侯。尙能豪縱醉江樓。笙歌雜沓娛清夜。風露高寒接素秋。少日壯心輕玉塞。暮年幽夢墮滄洲。人間清絕沉湘路。常笑靈均作許愁。

遣興

老子從來薄宦情。不辭落魄錦官城。生前猶著幾兩屐。身後更須千載名。樓外雪山森曉色。井邊風葉戰秋聲。一尊尙有臨邛酒。卻爲無憂得細傾。邛州宇文吏部餉酒絕佳。

六月九日夜步月至朝真觀

朝斗真人有舊祠。追涼老子曳筇枝。從來步月難爲客。此夕聽琴合有詩。竹院沉沉聞漏永。玉繩耿耿看星移。慙慙更作重來約。迨及冰輪未缺時。

十日夜月中馬上作

身遊碧海跨鯨魚。心似寒冰貯玉壺。衣溼三更清露墜。眼明萬里片雲無。橫空孤鶴曾相識。散髮飛仙定可呼。老向人間無復意。逝將從此謁清都。

百歲

百歲紛紛易白頭。一年鼎鼎又清秋。壯心空似驥伏櫪。病骨敢懷狐首丘。屠釣論交成酒隱。山林高臥得天遊。莫悲晚節功名誤。卽死猶堪贈醉侯。

獨飲醉臥比覺已夜半矣戲作此詩

澤畔元非慕獨醒。散人一飲費經營。也知世少蘇司業。安得官如阮步兵。醉著面顏驚少壯。澆餘胸次失崢嶸。更闌莫厭殘燈火。臥聽空廊絡緯聲。

蒙恩奉祠桐柏

少年曾綴紫宸班。晚落危途九折艱。罪大初聞收郡印。恩寬俄許領家山。羈鴻但自思煙渚。病驥寧容著帝閑。回首觚稜渺何處。從今常寄夢魂間。

和范待制月夜有感

榆枋正復異鵬飛。等是垂頭受鬪鞿。坐客笑談嘲遠志。故人書札寄當歸。醉思葍菜黏篙滑。饑憶鱸魚墜釣肥。誰遣貴人同此感。夜來風月夢苔磯。

和范待制秋興

策策桐飄已半空。啼螿漸覺近房櫳。一生不作牛衣泣。萬事從渠馬耳風。名姓已甘黃紙外。光陰全付綠尊中。門前剝啄誰相覓。賀我今年號放翁。

又

睡臉餘痕印枕紋。秋衾微潤覆爐熏。井桐搖落先霜盡。衣杵淒涼帶月聞。佛屋紗燈明小像。經奩魚蠹蝕真文。身如病驥惟思臥。誰許能空萬馬羣。

又

山澤沉冥氣尙豪。鬢絲未遽歎蕭騷。已忘海運鯤鵬化。那計風微燕雀高。萬里客魂迷楚峽。五更歸夢隔胥濤。故知有酒常勤醉。自古寧聞死可逃。

和范待制秋日書懷二首。游自七月病起。蔬食止酒。故詩中及之。

閑窗貝葉對旁行。不覺城笳報夕陽。嗜酒步兵猶未達。拂衣司諫亦成忙。室無摩詰持花女。囊有娑婆等價香。欲與衆生共安隱。秋來夢不到鱸鄉。陳文惠公松江詩云。西風斜日鱸魚鄉。傳本或誤作香字。張文潛嘗辨之。

又

故人無字寄相思。敢向窮途怨不知。老病已全惟欠死。貧嗔雖斷尙餘癡。數莖雪鬢江湖遠。九轉金丹日月遲。畚粟山苗俱可飽。明年東去隱峨眉。

卷第八

遊學射山遇景道人

肩輿適青郊。飛屐登翠麓。餘霜未泫瓦。晨日初掛木。推門覓黃冠。避客似奔鹿。雖無與晤語。清坐意亦足。豈知逢此士。曠度超世俗。欣然同一笑。齒頰粲冰玉。探囊贈奇草。甘香勝芍菊。試臨清鏡照。衰髮森已綠。出門恣幽討。老仙有遺躅。丹竈雖已空。藥丸遍山谷。嗟予迫遲暮。冠蓋厭追逐。結茅遠人境。此計亦已熟。若人真我友。玉宇當共讀。客來不知處。雞犬望雲屋。

城東醉歸深夜復呼酒作此詩

冬夜走馬城東回。追風逐電何雄哉。五門鼓動燈火鬧。意氣忽覺如章臺。歸來脫靴靴滿霜。月明如水浸野堂。梅花滿手不可負。催熾獸炭傳清觴。書生所懷未易料。會與君王掃燕趙。只愁漸老不禁寒。臥載輜車君勿笑。

融州寄松紋劍

十年學劍勇成癖。騰身一上三千尺。術成欲試酒半酣。直躡丹梯削青壁。青壁一削平無蹤。浩歌卻過蓮花峯。世人仰視那得測。但怪雪刃飛秋空。老胡畏誅奉約束。假息漁陽連上谷。願聞下詔遣材官。恥作腐儒常碌碌。

歲晚

歲晚城隅車馬稀。偷閑聊得掩荆扉。征蓬滿野風霜苦。多稼連雲雁鶩肥。報國有心空自信。結茅無地竟

安歸浣花道上人誰識。華表千年老令威。

玉京行觀煉丹作。

玉京清都奉紫皇。赤明開皇劫茫茫。有路坦如馳康莊。惜哉背之趨死鄉。絳陵朱兒朝吐光。森然箭鏃攢玉牀。潔齋山棲祓不祥。朝餐夕食芝朮香。縹囊藥笈出祕方。日精月華鍊陰陽。爐開沐浴時日良。清夜玉杵聞琳房。服之刀圭換肝腸。三十六帝參翱翔。下視一笑爭奪場。纍纍枯冢壓北邙。

步出萬里橋門至江上

久坐意不懌。掩卷聊出遊。一節吾事足。安用車與騶。浮生了無根。兩踵蹋百州。常憶航巨海。銀山卷濤頭。一日新雨霽。微茫見流求。在福州泛海東望。見流求國。西行亦足快。縱獵南山秋。騰身刺猛虎。至今血濺裘。命薄每自笑。校尉略已侯。短劍隱市塵。浩歌醉江樓。頗疑屠博中。可與共奇謀。丈夫等一死。滅賊報國讎。徒倚萬里橋。寒日墮前洲。

晚步

院荒有古意。僧少無人聲。徘徊楠陰下。賞此落日明。著書亦何急。寂寞身後名。今年復止酒。歌舞陳空觥。不如且消搖。出門隨意行。看竹入廢園。望江上高城。纖纖素月出。鶴鶴蒼煙橫。此夕當復奇。緱山吹玉笙。數日寒頓減。頗有春意感。懷賦短歌。

微陰寒不力。破臘春暗動。林梢報梅白。水際聞鳥哢。羈鴻漸整翮。一一勞目送。應憐飛蓬客。猶作浣花夢。平生江淮間。裘馬事豪縱。豈知老畏死。齋鉢受蔬供。忍饑每自笑。小飲未敢痛。何以慰寂寥。臥聽壓春甕。

春愁

春愁茫茫塞天地。我行未到愁先至。滿眼如雲忽復生。尋人似瘡何由避。客來勸我飛觥籌。我笑謂客君罷休。醉自醉倒愁自愁。愁與酒如風馬牛。

歲暮感懷

征塵十載暗戎衣。虛負名山采藥期。少日覆甌曾草檄。卽今橫槊尙能詩。昏昏殺氣秋登隴。颯颯飛霜夜出師。曾有英豪能共此。鏡中未用歎吾衰。

梅花

冰崖雪谷木未芽。造物破荒開此花。神全形枯近有道。意莊色正知無衰。高堅政要飽憂患。放棄何遽愁荒遐。移根上苑亦過計。竹籬茅屋真吾家。平生自嫌亦自許。妙處可識不可誇。金樽翠杓未免俗。篝火爲試江南茶。

寺居夙興

閑居無一事。睡少自夙興。空庭翠霧合。高樹紅日昇。曳杖遶四廊。悄然不逢僧。廚煙俄漠漠。魚鼓亦登登。晨粥香滿堂。梁肉坐可憎。匡山在何許。吾將買行藤。

萬里橋江上習射

坡隴如濤東北傾。胡牀看射及春晴。風和漸減雕弓力。野迴遙聞羽箭聲。天上機槍端可落。草間狐兔不須驚。丈夫未死誰能料。一箭他年下百城。

關山月

和戎詔下十五年。將軍不戰空臨邊。朱門沉沉按歌舞。廐馬肥死弓斷弦。戍樓刁斗催落月。二十從軍今白髮。笛裏誰知壯士心。沙頭空照征人骨。中原干戈古亦聞。豈有逆胡傳子孫。遺民忍死望恢復。幾處今宵垂淚痕。

出塞曲

佩刀一刺山爲開。壯士大呼城爲摧。三軍甲馬不知數。但見動地銀山來。長戈逐虎祁連北。馬前曳來血丹臆。卻回射雁鴨綠江。箭飛雁起連雲黑。清泉茂草下程時。野帳牛酒爭淋漓。不學京都貴公子。唾壺塵尾事兒嬉。

戰城南

王師出城南。塵頭暗城北。五軍戰馬如錯繡。出入變化不可測。逆胡欺天負中國。虎狼雖猛那勝德。馬前嗚咿爭乞降。滿地縱橫投劍戟。將軍駐坡擁黃旗。遣騎傳令勿自疑。詔書許汝以不死。股栗何爲汗如洗。

讀書

面骨崢嶸實欲疎。退藏只合臥蝸廬。自嫌尙有人間意。射雉歸來夜讀書。

又

歸老寧無五畝園。讀書本意在元元。燈前目力雖非昔。猶課蠅頭二萬言。時方讀小本通鑑。

晚過保福

堂靜僧閑普請疎。爐紅氈暖放參餘。蓮花池上容投社。椰子身中悔著書。茶試趙坡如潑乳。芋來犀浦可專車。放翁一飽真無事。擬伴園頭日把鉏。

偶過浣花感舊遊戲作

憶昔初爲錦城客。醉騎駿馬桃花色。玉人攜手上江樓。一笑鉤簾賞微雪。寶釵換酒忽徑去。三日樓中香未滅。市人不識呼酒仙。異事驚傳一城說。至今西壁餘小草。過眼年光如電掣。正月錦江春水生。花枝缺處小舟橫。閑倚胡牀吹玉笛。東風十里斷腸聲。

夜讀唐諸人詩多賦烽火者因記在山南時登城觀塞上傳烽追賦一首

我昔遊梁州。軍中方罷戰。登城看烽火。川迴風裂面。青燐竝駱谷。隱翳連鄠縣。月黑望愈明。雨急滅復見。初疑雲罅星。又似山際電。豈無酒滿尊。對此不能嚙。低頭媿虎韞。零落白羽箭。何時復關中。卻照甘泉殿。平明出小東。門觀梅。

知心多別離。慰眼易零落。東風吹梅花。爛漫照城郭。晴日千堆雪。偏宜馬上看。逢迎無幾日。不惜犯春寒。明年花發時。我在兩京道。花香固無盡。我亦未遽老。脫帽髮如漆。看花心未灰。平戎那得妨。持酒會有詩。傳劍外來。

寺居睡覺

虛窗寂寂夜三更。燈斂殘光避月明。老嬾只貪春睡美。媿聞童子誦經聲。

又



心地安平曉夢長。忽聞魚鼓動修廊。披衣起坐清羸甚。想像雲堂魚粥香。僧雜菜餌之屬作粥名魚粥。

樓上醉書

丈夫不虛生世間。本意滅虜救河山。豈知蹭蹬不稱意。八年梁益凋朱顏。三更撫枕忽大叫。夢中奪得松亭關。中原機會嗟屢失。明日茵席留餘潛。益州官樓酒如海。我來解旗論日買。酒酣博簊爲歡娛。信手梟盧喝成采。牛背爛爛電日光。狂殺自謂元非狂。故都九廟臣敢忘。祖宗神靈在帝旁。

醉題

裘馬清狂錦水濱。最繁華地作閑人。金壺投箭消長日。翠袖傳盃領好春。幽鳥語隨歌處拍。落花鋪作舞時茵。悠然自適君知否。身與浮名若箇親。

初春出遊

春風初來滿刁州。江水照人如潑油。犢車芳草南陌頭。家家傾貲事遨遊。萬里橋西繫黃驄。爲君一登散花樓。半年長齋廢觥籌。興來忽典千金裘。小桃婀娜弄芳柔。紅蘭茁芽滿春洲。墟邊女兒不解愁。鬪草纔罷還藏鈎。可憐世人自拘囚。盎中乾坤舞蜚螭。百年苦短去日遄。問君安用萬戶侯。

芳華樓夜飲

春風射雉苑城旁。走馬還來入醉鄉。夜暖酒波搖燭焰。舞回粧粉鑠花光。浮生一笑常難必。此樂它年未易忘。莫作五陵豪俠看。奚奴歸路有詩囊。

又

輕客退遊亦樂哉。城南城北古池臺。香生赭汗連錢馬。光溢金船撥雪醅。難覓長繩縻日住。且憑羯鼓喚花開。一春政使渾無事。醉到清明得幾回。

東門外遍歷諸園及僧院觀遊人之盛

馬上哦詩畫醉鞭。東城南陌去翩翩。微風蹙水魚鱗浪。薄日烘雲卵色天。隔屋鳩鳴閑院落。爭門花簇小輜駟。病來久已疎杯酌。春物撩人又破禪。

城東馬上作

古寺名園處處行。翩然南陌復東城。手柔弓燥獵徒喜。耳熱酒酣詩興生。月似有情迎馬見。鶯如相識向人鳴。摩挲病眼還三歎。猶擬中原看太平。

又

割鮮藉草醉春醪。仰看鳴鶻百尺高。杜老何妨希稷契。孔明本自陋袁曹。邊頭插羽無傳檄。篋裏盤飴有舊袍。寄語長安衆年少。妓圍不似獵圍豪。

丁酉上元

突兀毬場錦繡峯。遊人士女擁千重。月離雲海飛金鏡。燈射冰簾掣火龍。信馬隨車紛醉俠。賣薪買酒到耕農。今年自笑真衰矣。但覺憑鞍睡思濃。

又

鼓吹連天沸五門。燈山萬炬動黃昏。美人與月正同色。客子折梅空斷魂。寶馬暗塵思笠路。釣船孤火夢

江村古來漫道新知樂。此意何由可共論。

又

放翁也入少年場。一笑燈前未歇狂。翠袖成圍欺月冷。氈車爭道覺塵香。蠻酥點綴春風早。楚餌留連夜漏長。結騎莫辭侵曉色。昔人萬里看西涼。

後陵永慶院在大西門外不及一里蓋王建墓也有二石幢猶當時物又有太后墓琢石爲人馬甚偉

陵闕淒涼俯舊邦。恨流袞袞似長江。穿殘已歎金鳧盡。缺落空餘石馬雙。攬飯飢烏占寺鼓。避人飛鼠上經幢。阿和乳臭崇韜耄。堪笑昏童束手降。

小飲趙園

少年結騎厭追歡。漸老方知一笑難。邂逅偶能成午醉。登臨未覺怕春寒。高林橫鶯丹青幅。亂蝶爭花錦繡團。滿眼風光索彈壓。酒盃須似蜀江寬。

和范舍人書懷

歲月如奔不可遮。卽今楊柳已藏鴉。客中常欠尊中酒。馬上時看檐上花。末路淒涼老巴蜀。少年豪舉動京華。天魔久矣先成佛。多病維摩尙在家。

和范舍人病後二詩末章兼呈張正字

放衙元不爲春醒。澹蕩江天氣未清。欲賞園花先夢到。忽聞簷雨定心驚。香雲不動熏籠暖。蠟淚成堆斗

帳明關隴宿兵胡未滅。祝公垂意在尊生。

又

士生不及慶曆初。下方元祐當勿疎。請看蛟龍得雲雨。豈比鳥雀馴階除。舍人起視北門草。學士歸著東觀書。劍外老農亦吐氣。釀酒畦花常晏如。

江路見杏花

我行浣花村。紅杏紅於染。數樹照南陂。一林藏北崦。雖慚嶺梅高。繁麗豈易貶。雨絲飛復止。雲葉低未斂。似嫌風日緊。護此燕脂點。身閑得縱觀。無語吾所歎。

夜聞雨聲

高簷夜雨瀉淋漓。起擁寒衾旋炷香。春事豈堪頻破壞。客愁不可復禁當。長餅磊落輸郫釀。輕騎聯翩報海棠。著意物華君莫笑。世間得喪更茫茫。

海棠

十里迢迢望碧雞。一城晴雨不曾齊。今朝未得平安報。便恐飛紅已作泥。

又

蜀地名花擅古今。一枝氣可壓千林。譏彈更到無香處。常恨人言太刻深。

張園海棠

洛陽春信久不通。姚魏開落胡塵中。楊州千葉昔曾見。已歎造化無餘功。西來始見海棠盛。成都第一推

燕宮池臺掃除凡木盡。天地眩轉花光紅。慶雲墮空不飛去。時有絳雪縈微風。蜂蝶成團出無路。我亦狂走迷西東。此園低樹猶三丈。錦繡卻在青天上。不須更著刀尺裁。乞與齊奴開步障。

登劍南西川門感懷

自古高樓傷客情。更堪萬里望吳京。故人不見暮雲合。客子欲歸春水生。瘴癘連年須藥石。退藏無地著柴荆。諸公勉畫平戎策。投老深思看太平。

和范舍人永康青城道中作

風驅雨壓無浮埃。驂驪千騎東方來。勝遊公自輩王謝。淨社我亦追宗雷。岷山樓上一徙倚。如地始闢天初開。廓然眼界三萬里。山一螻垤水一杯。世間幻妄幾變滅。正自不滿吾曹哈。丈夫本願布衣老。達士詎畏蒼顏催。君看神君歲食羊四萬。處處棄骨高成堆。西山老翁飽松麩。造物賦予何遼哉。

宿上清宮

永夜寥寥憩上清。下聽萬壑度松聲。星辰頓覺去人近。風雨何曾敗月明。是夕山下風雨絕。頂月明達曉。早歲文辭妨至道。中年憂患博虛名。一菴儻許西峯住。常就巢仙問養生。上官道人巢居山中。

登上清小閣

樓觀參差倚晚晴。偶然信腳得閑行。欲求靈藥換凡骨。先挽天河洗俗情。雲作玉峯時特起。山如翠浪盡東傾。何因從此橫空去。笙鶴飄然過洛城。

小憩長生觀飯已遂行

清絕長生觀。再遊疑後身。人間空石劫。物外自壺春。道士青精飯。先生烏角巾。回頭增悵望。倦馬撲征塵。

新津小宴之明日欲遊修覺寺以雨不果呈范舍人

風雨長亭話別離。忍看清淚濕燕脂。酒光搖蕩歌雲暖。不似西樓夜宴時。

又

新津渡頭船欲開。山亭準擬把離盃。不如意事十八九。正用此時風雨來。

眉州驛舍睡起

平生百無能。一嬾每自喜。胡爲八年間。逐食走萬里。身如盤汞轉。心似爐丹死。事君未免媿。富貴不如已。雨餘古驛涼。晝寐無錯履。澹然得高臥。睡思極清美。心平了無夢。驚覺何自起。尙嫌漆園蝶。肯作南柯螳。斜陽生木影。龍蛇滿窗紙。煎茶儻已熟。一笑問童子。

送范舍人還朝

平生嗜酒不爲味。聊欲醉中遺萬事。酒醒客散獨悽然。枕上屢揮憂國淚。君如高光那可負。東都兒童作胡語。常時念此氣生癭。況送公歸覲明主。皇天震怒賊得長。三年胡星失光芒。旄頭下掃在旦暮。嗟此大議知誰當。公歸上前勉畫策。先取關中次河北。堯舜尙不有百蠻。此賊何能穴中國。黃扉甘泉多故人。定知不作白頭新。因公併寄千萬意。早爲神州清虜塵。

過魚蛇市小寺

六月苦多雨。肩輿走江村。過市居人集。陟險兵子喧。日暝休野市。汛掃開北軒。霧氣如蒼虬。天矯出洞門。

溪清見白石，糾結菖蒲根。游魚去甚健，投餌棄不吞。嗟予獨何爲，貪祿忘故園。馳驅不自恤，面有風沙痕。俯仰二十年，竟孤明主恩。寄謝衆君子，努力蘇元元。

眉州作

扁舟久不泛蟆津，常恐黃塵解污人。爛醉破除千日懣，予不至眉山三年矣。狂吟判斷四州春，此行自成都歷永康。唐安至眉山，汀洲漸歎蘋花老。風露初嘗荔子新，便欲騎鯨東海去。勝游未忍別峨眉。

過修覺山不果登覽

前日泛江時，雨昏失南山。今日迎我馬，鬢髻擁髻鬟。白塔映朱閣，間見青林間。問我豈忘之，揚鞭亟西還。西還亦聊爾，行矣來憑欄。樓樓紅塵中，豈無一日閑。曾復廣此詩，大書榜其顏。但恐厄風雨，清游天所慳。

青城縣會飲何氏池亭贈譚德稱

赤日黃塵行路難，青城縣裏得偷閑。十年去國悲霜鬢，六月登樓望雪山。醉客千言猶落筆，美人斗酒未醺顏。憑誰喚住譚夫子，更與徘徊水石間。

題菴壁

偶向城南卜草廬，二年浪迹寄樵漁。大牀獨臥豪猶在，萬衆橫行策竟疎。清濁戲分春甕酒，朱黃閑勘夜窗書。衰顏安用頻看鏡，日日元知有不如。

幽居

殊方飄泊向誰論，小住僧廬亦所欣。得飽罷揮求米帖，愛眠新著毀茶文。摘蔬籃小霑清露，斲藥鉏輕帶

溼雲從此生涯足。幽事宦遊虛用半生勤。

又

剡曲故廬歸未得。暫從地主借茅茨。桃花春水夢不到。菘菜秋風心自知。強健猶穿幾兩屐。榮華正似一  
鉤絲。此心炯炯無人會。煙雨蒼茫獨立時。

浣花女

江頭女兒雙鬢丫。常隨阿母供桑麻。當戶夜織聲啞啞。地爐豆豉煎土茶。長成嫁與東西家。柴門相對不  
上車。青裙竹笥何所嗟。插髻燦燦牽牛花。城中妖姝臉如霞。爭嫁官人慕高華。青驪一出天之涯。年年傷  
春抱琵琶。

七月八日馬上作

溝水浸新月。街槐生碧煙。明河七夕後。倦馬五門前。小市燈初鬧。高樓鼓已傳。賦詩寬客恨。哦罷卻凄然。

江樓

急雨洗殘瘴。江邊閑倚樓。日依平野沒。水帶斷槎流。擣紙荒村晚。呼牛古巷秋。腐儒憂國意。此際入搔頭。

夜登小南門城上

曳杖上江城。清宵破二更。月回高樹影。風壯急灘聲。野艇魚罾舉。優場炬火明。湖塘正如此。回首憶柴荆。  
予故山在鏡湖之南。

野步至青羊宮偶懷前年嘗劇飲於此



錦官門外曳枯筇。此地大教著放翁。萬事元無工拙處。一官已付有無中。擎雲柏樹瘦蛟立。繞郭江流清鏡空。欲把酒盃終覺嬾。緩歌曾醉落花風。

月夜江濱池納涼

微逕荒城曲。叢祠野水邊。月能從我醉。風欲駕人仙。靜看黏螢草。遙聞采芡船。熱官那有此。留滯莫尤天。

華亭院僧房

半闔朱門見綠苔。幽花仍傍小山開。劍南七月暑未退。明日更攜棋簞來。

又

悠悠馬上困思茶。休歇僧房到日斜。殿背無人綠錢滿。小盆零落珊瑚花。

乾明院觀畫

唐年蘭若占閑坊。名畫蕭條半在亡。簌簌踈篁常似雨。陰陰古屋自生涼。人門疊鼓初催講。喚馬斜陽欲滿廊。顯晦熟思真有數。萬金奇跡乘頽牆。院中有舊筌花竹幾二十壁多已壞矣。

登城

我登少城門。四顧天地接。大風正北起。號怒撼危堞。九衢百萬家。樓觀爭岌嶮。臥病氣壅塞。放目意頗愜。永懷河洛間。煌煌祖宗業。上天祐仁聖。萬邦盡臣妾。橫流始靖康。趙魏血可蹀。小胡寧遠略。爲國恃剽劫。白晝勢難久。外狃中已懼。籍民備勝廣。陞戟畏荆蒞。誰能提萬騎。大呼去聲。擁馬鬣。奇兵四面出。快若霜掃葉。植旗朝受降。馳驛夜奏捷。豺狼一朝空。狐兔何足獵。遺民世忠義。泣血受汗脅。繫箭射我詩。往檄五

陵俠。

秋日登仙遊閣

馬蹄連早暮。車塵細如霧。誰知此路邊。高閣下風馭。頗傳秋月夕。語笑聯杖屨。始知仙與人。混迹無異處。我來想鸞鶴。稽首祈一顧。飛仙不可見。惟與白雲遇。白雲如有情。傍我欄角住。借問何山來。雲驚卻飛去。

自詠

華髮蕭蕭居士身。江頭風雨折烏巾。無人問字尤宜嬾。有吏徵租未是貧。薄宦儻來難倚仗。舊交漸少每酸辛。敲門且復尋僧話。要結他生物外因。

雜詠

青羊宮中竹暗天。白馬廟畔柏如山。琴尊處處可消日。車馬紛紛自欠閑。

又

石犀廟壩江已回。陵谷一變吁可哀。卽今禾黍連雲處。當日帆檣隱映來。

又

微風翻翻芋葉白。落日漠漠稻花香。出門縱轡何所詣。萬里橋南追晚涼。

又

世事盛衰誰得知。惠陵煙草掩柴扉。陵邊人家叢竹裏。燈火喧呼迎婦歸。

大醉歸南禪弄影月下作

昔我變姓名。釣魚散花洲。有船不用楫。江急聽自流。卽今客錦城。醉過百花樓。天風吹筍輿。快若凌空遊。月露浩無際。指點隘九州。君看塵土中。頗有此樂不。題詩碧玉簡。飛仙相答酬。酒醒墮何處。樓臺海山秋。

訪楊先輩不遇因至石室  
牆東卽石經堂。

### 病酒戲作

新秋風月佳。數夕破酒戒。飲少輒醉眠。衰早頗自怪。高春未離枕。眩轉疑屋壞。家人具雞豚。熟視不能嘖。尙無千里蕁。敢覓鏡湖蟹。一盃苦蕒蘆。價直娑婆界。

### 訪昭覺老

久矣耆年罷送迎。喜聞革履下堂聲。遊山笑我驀直去。過夏憐君太瘦生。庭際楠陰凝晝寂。牆頭鶻語報秋晴。功名已付諸賢了。長作閑人樂太平。

### 書臥

秋暑侵人氣力微。燒香高枕掩齋扉。弄姿野蘂晴猶斂。作態江雲晚未歸。身外極知皆夢事。世間隨處有危機。故山松菊今何似。晚矣淵明悟昨非。

### 晚步江上

萬里橋邊帶夕陽。隔江漁市似清湘。山林獨往吾何恨。車馬交流渠自忙。高柳陰中扶拄杖。平沙穩處據

胡牀故人京國無消息。安得相攜笑此涼。

夜坐

大風橫吹斗柄折。迅雷下擊山壁裂。放翁閉戶寂不聞。楞嚴卷盡燈花結。

夜行

紅藤拄杖扶衰病。村北村南破夜行。閑繞長堤逐螢火。戲臨荒沼問鸚聲。倦遊但有筇筴興。久客真諳襤  
褸情。安得故人同一醉。三更城上看河傾。

悲秋

一拋蓑笠雪溪舟。八載梁州復益州。纔破繁華海棠夢。又驚搖落井梧秋。曉班無復趨行殿。晚境惟思老  
寢丘。病肺經旬疎酒盞。愁來惟是上南樓。

城北青蓮院方丈壁間有畫燕子者。過客多題詩。予亦戲作二絕句。

一雙掠水燕來初。萬點飛花社雨餘。辛苦成巢君勿笑。從來吾亦愛吾廬。

又

明窗短壁拂蛛絲。常是江邊送客時。留滯錦城生白髮。不如巢燕有歸期。

睡起

閑身喜午睡。睡起日猶早。茂竹青入簷。幽花紅出草。苔錢亦滿砌。護惜不忍掃。宦情本自疎。此地可忘老。

天涯

天涯到處自生愁。游子征塵暗。裘燈火青燐。五門夜風煙索莫。二江秋帝城漫誦新詩句。客路難逢舊輩流。送老把茅須早決。此生何止四宜休。

暇日行城上同行追不能及

疾步登城殊未衰。欣然一笑擲筇枝。正當閑似白鷗處。不減健如黃犢時。秋野煙雲橫慘淡。暮天樓閣倚參差。高吟醉舞忘歸去。乞與丹青畫怪奇。

感秋

西風繁杵擣征衣。客子關情正此時。萬事從初聊復爾。百年彊半欲何之。畫堂蟋蟀怨清夜。金井梧桐辭故枝。一枕淒涼眠不得。呼燈起作感秋詩。

雙流旅舍

孤市人稀冷欲冰。昏昏一盞店家燈。開門拂榻便酣寢。我是江南行腳僧。

又

西風黃葉滿江村。瘦馬來穿渡口雲。動地傳呼逢醉尉。誰何禁殺故將軍。

又

每因髀肉歎身閑。聊欲勤勞鞍馬間。黑稍黃旗端未免。會衝風雪出榆關。

早行至江原

喔喔鳴雞促起程。翻翻飛鷺導孤征。節旄盡落歸猶遠。帶眼頻移瘦自驚。小市蕭條黃葉滿。斷橋零落綠

苦生居人猶復多愁思。何況天涯倦客情。

安仁道中

千古臨邛路。飄然偶獨遊。病身那迫老。遠客更禁秋。水退橋未葺。渡閑船自流。飛騰付年少。回首思悠悠。

又

三驛未爲遠。衰翁愁出門。貪程多卒卒。失睡每昏昏。天大圍平野。江回隔近村。何時有餘俸。小築占雲根。

八月十四夜三叉市對月

去年看月籌邊樓。雲罽微光如玉鈎。主人不樂客歎息。清歌空送黃金舟。今年看月三叉市。纖雲不作良宵祟。素娥命駕洗客愁。我亦傾杯邀共醉。風露萬里方渺然。冰輪無轍行碧天。盈盈耿耿意無盡。月不忍落人忘眠。一言欲報廣寒殿。茅簷華屋均相見。明年萬事不足論。但願月滿人常健。

豐橋旅舍作

我本山林人。心期在塵表。出門消底物。兩屨萬事了。羣兒何足愠。爲爾常悄悄。今朝山中路。更喜相識少。三叉市人醉爭席。豐橋逆旅留饋食。小婦梳髻高一尺。梭聲札札當戶織。

文君井

落魄西州泥酒盃。酒酣幾度上琴臺。青鞋自笑無羈束。又向文君井畔來。相如琴臺在成都城中。文君井在邛州。相傳爲卓氏故宅。

白鶴館夜坐

竹聲風雨交。松聲波濤翻。我坐白鶴館。燈青無晤言。廓然心境寂。一洗吏卒喧。袖手哦新詩。清寒媿雄渾。屈宋死千載。誰能起九原。中間李與杜。獨招湘水魂。自此競摹寫。幾人望其藩。蘭若看翡翠。煙雨啼青猿。豈知雲海中。九萬擊鵬鷖。更闌燈欲死。此意與誰論。

南津勝因院亭子

南江平無風。如鏡新拂拭。漁舟不點破。潏潏千頃碧。闌干西北角。雲散山爭出。披陔競南走。翠入窗戶窄。江山不世情。作意娛此客。豈無尊中酒。豪飲非宿昔。明當還成都。塵土埋馬跡。後巖在眼中。飛去無羽翼。後巖在鳳凰山後七八里。山水尤奇絕。

登邛州譙門門三重其西偏有神仙張四郎畫像張蓋隱白鶴山中

浮雲在腳底。千里在眼邊。攀躋忽至此。倚柱眩欲顛。車馬細如螻。紛紛衢路間。嗟汝何爲者。馳驅窮歲年。我本澹蕩人。此心實愛閑。向來出處際。不媿咫尺天。風吹哦詩聲。十里搖西山。懸知老仙翁。爲我一粲然。

書寓舍壁

天與癡頑不解愁。未埋病骨且閑遊。山於拄杖橫時看。路到芒屨破處休。初擬燒丹住南嶽。卻因學劍客西州。秋風巾褐添蕭爽。又作臨邛十日留。

又

落佩頽冠慣放慵。經旬寓館古臨邛。西偏取路橫穿竹。北向開門倒看松。醉後蹇驢歸薄暮。閑來支枕睡高春。鵝鳴山谷曾遊處。剩欲扶犁學老農。鵝鳴一名鵝鳴。在邛之大邑縣。

次韻使君吏部見贈時欲遊鶴山以雨止

蝮頤江上約同行。白鶴峯前辱寄聲。青史功名男子事。後堂歌舞故人情。午甌誰致葉家白。春甕旋撥郎官清。登覽不嫌鳩喚雨。十年芒屨慣山程。

西巖翠屏閣

把酒孤亭半日留。西巖獨擅鶴山秋。也知絕境終難賦。且喜閑身得縱遊。鶴起危巢時磔磔。鹿鳴深澗暮呦呦。人生適意方爲樂。甲第朱門祇自囚。

幽居院

久墮塵沙裏。幽尋始此行。侵雲千嶂合。披草一僧迎。薜潤泉時滴。崖傾竹倒生。登高忽平曠。回首失崢嶸。老矣猶孤客。歸哉念耦耕。結廬殊未定。此地頗關情。

中溪

散人無俗事。日日山中行。今朝中溪寺。妙絕不可名。幽處萬木合。忽然千頃平。綠黛染晴嶂。白雲如玉城。巖花勸小酌。天風吹獨醒。雖無九臯鶴。奇哉此松聲。我如折翼鵬。回盡九萬程。脫屣擲拄杖。於此餞餘生。

天台院有小閣下臨官道予爲名曰玉霄

竹輿衝雨到天台。綠樹陰中小閣開。榜作玉霄君會否。要知散吏按行來。予所領崇道觀。蓋在天台山中。玉霄峯下。

山中小雨得字文使君簡問嘗見張仙翁乎戲作一絕



張仙挾彈知何往。清嘯穿林但可聞。拾得鐵丸無處用。爲君打散四山雲。張四郎常挾彈。視人家有災疾者。輒以鐵丸擊散之。

雨中山行至松風亭忽澄霽

煙雨千峯擁髻鬟。忽看青嶂白雲間。卷藏破墨營丘筆。卻展將軍著色山。

贈宋道人

我不如昔人。騎鶴上九天。玉簡奏事虛皇前。平生嵩養氣。羸全兩脚馳。走輕如煙。烏道懸崖忽飛蹇。戲擲短劍聲鏗然。轉盼跳下千仞淵。已復取劍升層巔。騰猿俊鶴爭後先。飢食松花掬飛泉。金骨綠髓漸凝堅。口哦七字黃庭篇。西來欲訪挾彈仙。丹經劍訣更精研。嗟哉一失五百年。作詩付子勿妄傳。

自山中泛舟歸郡城

我呼小艇浮南津。落日亂山銜半輪。背船雙鷺低掠水。下灘峭風冷逼人。中流回望始太息。煙中白塔高嶙峋。適從彼來忽在此。老夫拄杖捷有神。尉曹堆盤笠澤膾。秀才瀉榼中山春。豈惟外物不挂眼。醉後兀爾忘吾身。朝冠行卽挂神武。買犢遂欲耕峨岷。金丹自喜日日長。白髮未許年年新。擁橋炬火遠已闌。歸舍睡息清而勻。明朝笑謂同載客。有腳莫踏東華塵。

次韻宇文使君山行

城中望西山。爽氣固可致。不如山中行。衣履染濃翠。使君資高逸。鐵馬奏橫吹。平郊何曠蕩。修竹亦清閤。旣聞蘇門嘯。遂挹浮丘袂。似嫌太清絕。開宴盡主意。戲留楚臺雲。寶鬢鬪姿媚。珠貫按歌聲。泉湧發詩思。

歸來殊不倦。吏牘閱千紙。卻笑江左人。把酒輒遺事。下客亦未衰。尙可提萬騎。安能學胡公。危苦寄鶴翅。仙人胡安學。道西巖。跨鶴上昇山。以此得名。

同王無玷羅用之訪臨邛道士墓

樂天詩句本嘲談。那有人從碧海來。五百年間逢好事。披榛來訪此崔嵬。

登太平塔

我從平地來。忽寄百尺巔。眼力與脚力。初不減少年。漸高山愈出。杳杳浮雲煙。舉手捫參旗。日月磨螳旋。天風忽吹衣。便欲從此仙。且復下梯去。著書未終篇。

中夜投宿修覺寺

陸走崔嵬水下瀧。客中更復客它邦。晚離方井雲藏市。夜渡新津火照江。人語紛紛投野寺。牀敷草草寄僧窗。五更風雨妨歸夢。臥看殘燈吐半缸。

絕勝亭

蜀漢羈遊歲月侵。京華乖隔少來音。登臨忽據三江會。飛動從來萬里心。地勝頓驚詩律壯。氣增不怕酒盃深。一琴一劍白雲外。揮手下山何處尋。

雲谿觀竹戲書二絕句

氣蓋冰霜勁有餘。江邊見此列仙瓊。清寒直入人肌骨。一點塵埃住得無。

又

溪光竹色兩相宜。行到溪橋竹更奇。對此莫論無肉瘦。閉門可忍十年飢。

九月十日如漢州小獵於新都彌牟之間投宿民家

適從邛州歸。又作漢州去。天低慘欲雪。遊子悲歲弊。十年辭京國。疋馬厭道路。陸火炎高岡。江雲暗空戍。角弓寒始勁。霜鶻飢更怒。邂逅成小獵。尺箠聊指呼。北連武侯祠。南並稚子墓。合圍蹙窮鹿。設伏截狡兔。壯哉帶箭雉。耿介死不顧。吾寧暴天物。戰法因得寓。黃昏過民家。休馬燎裘袴。割鮮盛燔炙。毛血灑庭戶。老姥亦復奇。汛掃邀我駐。丈夫儻未死。千金酬此遇。

獵罷夜飲示獨孤生

客途孤憤只君知。不作兒曹怨別離。報國雖思包馬革。愛身未忍貨羊皮。呼鷹小獵新霜後。彈劍長歌立雨時。感慨卻愁傷壯志。倒瓶濁酒洗餘悲。

又

關輔何時一戰收。蜀郊且復獵清秋。洗空狡穴銀頭鶻。突過重城玉腕騶。賊勢已衰真大慶。士心未振尙私憂。一樽共講平戎策。勿爲飛鳶念少游。

又

白袍如雪寶刀橫。醉上銀鞍身更輕。帖草角鷹掀兔窟。憑風羽箭作鷗鳴。關河可使成南北。豪傑誰堪笑死生。欲疏萬言投魏闕。燈前攬筆涕先傾。

自廣漢歸宿十八里草市

月黑叩店門。燈青坐牀簀。飯糲雜沙土。菜瘦等草棘。泰然均一飽。未覺異玉食。我豈兒女哉。口腹爲怨德。古人恥懷祿。不仕當力穡。從今扶犁手。終老謝翰墨。

東郊飲村酒大醉後作

丈夫無苟求。君子有素守。不能垂竹帛。正可死隴畝。邯鄲枕中夢。要是念所有。持枕與農夫。亦作此夢否。今朝櫟林下。取醉村市酒。未敢羞空囊。爛漫詩千首。

九月十八夜夢避雨叩一僧院有老宿年八十許邀留甚勤若舊相識者夢中爲賦此詩

書簷急雨傾高秋。夜投丈室燈幽幽。耆年擁毳雪滿頭。拂拭牀敷邀我留。離猊戲擲香出喉。蓬蓬結成蒼玉毬。蠻童揭簾待者憂。觸散香煙當罰油。

秋晚登城北門

幅巾藜杖北城頭。卷地西風滿眼愁。一點烽傳散關信。兩行雁帶杜陵秋。山河興廢供搔首。身世安危入倚樓。橫槊賦詩非復昔。夢魂猶繞古梁州。

卷第九

秋興

成都城中秋夜長。燈籠蠟紙明空堂。高梧月白繞飛鵲。衰草露溼啼寒螿。室上書生讀書罷。欲眠未眠偏斷腸。起行百匝幾歎息。一夕綠髮成秋霜。中原日月用胡曆。幽州老酋著柘黃。滎河溫洛底處所。可使長

作旃裘鄉。百金戰袍。鵬鶴盤三尺劍。鋒霜雪寒。一朝出塞。君試看。且發寶雞暮長安。

夜飲

引劍酣歌亦壯哉。要君共覆手中盃。秋鴻陣密橫江去。暮角聲酣戰雨來。莫恨皇天無老眼。請看白骨有青苔。中年倍覺流光速。行矣西郊又見梅。

暮秋

時序中年速。風霜客路長。孤愁巴月白。清夢楚山蒼。燈暗秋銜壁。鐘疎夜殷床。端居有微祿。不敢恨殊方。

又

萬里歸無策。八年淹此留。羞蒙子公力。寧倦長卿遊。聽雨瀟湘夜。飛鷹鄠杜秋。更須論富貴。此計亦悠悠。

夜雨有感

北風吹雨暗江郊。十月僧廬旋補茆。病馬敢希三品料。驚禽聊借一枝巢。少時諸老爭求識。晚歲殊方罕定交。閉戶不妨新得趣。丹經盈篋手親抄。

道室

一室冷如水。人疑在定僧。手稱丹竈火。紗護佛龕燈。食減形雖槁。心虛氣自凝。平生坐忘論。字字欲銘膺。

飯罷戲作

南市沾濁醪。浮蠹甘不壞。東門買彘骨。醢醬點橙籩。蒸雞最知名。美不數魚蟹。輪囷犀浦芋。磊落新都菜。欲賡老饕賦。畏破頭陀戒。況予齒日疎。大嚼敢屢嘜。杜老死牛脔。千古懲禍敗。閉門餌朝霞。無病亦無債。

初冬夜宴

絲管紛紛燭滿堂。臯盧擲罷夜飛觴。帷犀風定歌雲暖。香獸煙濃漏箭長。泛菊已成前日夢。探梅又續去年狂。醉歸自笑摧頽甚。冷逼貂裘怯曉霜。

冬夜醉歸復小飲

野外歸來晚。空庭露氣新。乍晴雲妬月。多病酒欺人。倚杖行吟久。投盃起舞頻。早梅消息動。春事漸關身。

病酒述懷

閑處天教著放翁。草廬高臥笮橋東。數莖白髮悲秋後。一盞青燈病酒中。李廣射歸關月墮。劉琨嘯罷塞雲空。古人意氣憑君看。不待功成固已雄。

數日暄妍頗有春意予閑居無日不出遊戲作

小春花蕾索春饒。已有暄風入紫貂。村路雨晴鳩婦喜。射場草綠雉媒嬌。苑邊結客飛金勒。樓上誰家弄玉簫。莫怪夕陽歸獨後。早梅喚我度谿橋。蜀宣華苑在摩訶池上。

遣興

耆舊日凋謝。將如此老何。懣拈如意舞。狂叩唾壺歌。郡縣輕民力。封疆恃虜和。功名莫看鏡。吾意已蹉跎。

趙將軍井序

客爲子言靖康建炎間。關中奇士趙宗印者。提義兵擊虜。有衆數千。所向輒下。虜不敢當。會王師敗於富平。宗印知事不濟。大慟於王景略廟。盡以金帛散其下。被髮入華山。不知所終。予感

事爲作此詩。

我夢遊太華。雲開千仞青。壁山瀉黃河。萬古仰巨靈。往者禍亂初。氛祲於太寧。豈無臥雲龍。一起奔風霆。時事方錯謬。三秦盡羶腥。山河銷王氣。原野失大刑。將軍散髮去。短劍斷茯苓。定知三峯上。爛醉今未醒。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地理憂。生希李廣名飛將。死慕劉伶贈醉侯。戲語佳人頻一笑。錦城已是六年留。退之詩云。越女一笑三年留。

曳策遊房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空霰雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。

謁漢昭烈惠陵及諸葛公祠宇

雨止風益豪。雪作雲不動。淒涼漢陵廟。衰草臥翁仲。畫妓空笙竽。土馬闕羈鞅。壤沃黃犢耕。柏密幽鳥啼。尙想忠武公。身任社稷重。整整渭上營。氣已無岐雍。少須天意定。破賊寧患衆。興亡信有數。星隕事可痛。陵邊四五家。茆竹居接棟。手皸紙上箔。居民皆以造紙爲業。酷熟酒鳴甕。雖嗟生理微。亦足追飢凍。劉葛固雄傑。閱世均一夢。論高常近迂。才大本難用。九原不可作。再拜臨風慟。

遙夜

遙夜雨聲急。悵悵窗戶幽。開編堯舜在。得句鬼神愁。同俗愚儒臯。容身壯士羞。燈殘不成睡。曉角動南樓。

遠遊

遠遊行復歲華新。嬾學劉郎問大鈞。一點不蒙稽古力。十分合作臥雲身。苦寒與酒頓增價。小雨爲梅先辟塵。擬佩一壺江路去。花邊醉墮白綸巾。

大雪歌 累日作雪竟不成感賦此篇

長安城中三日雪。潼關道上行人絕。黃河鐵牛僵不動。承露金盤凍將折。虬鬚豪客狐白裘。夜來醉眠寶釵樓。五更未醒已上馬。衝雪卻作南山遊。千年老虎獵不得。一箭橫穿雪皆赤。擎空爭死作雷吼。震動山林裂崖石。曳歸擁路千人觀。憫餒作枕皮蒙鞍。人間壯士有如此。胡不來歸漢天子。

簡譚德稱

幼與骨相稱。山巖自要閑遊不避讒。錦里先生爲老伴。玉霄散吏是頭銜。探春苑路花蓂帽。看月江樓酒滿衫。惟恨題詩無逸氣。媿君陣馬與風颿。

排悶

世事何知與願違。十年高臥看羣飛。獵園花市無人問。漁艇煙村有夢歸。銀燭焰長搖酒浪。寶刀佩穩壓戎衣。君看白首寒窗客。俠氣縱橫亦未非。

夜意

名姓人誰記。形骸老漸侵。酒慳停劇飲。詩退負高吟。雨隔疎更斷。雲藏古院深。衰遲常兀兀。惆悵少年心。

又



心清知睡少。氣定覺神凝。但有一無媿。何妨百不能。燈昏如隔霧。研冷欲生冰。兀爾遺身世。東窗待日升。

瘴地晨霜薄。郊墟暮雨昏。啼螿如有恨。微火解相溫。末路真無策。孤忠敢自言。輪囷肝膽在。白首倚乾坤。

玉局觀拜東坡先生海外畫像

商周去不還。盛哉漢唐宋。蘇公本天人。謫墮爲世用。太平極嘉祐。珠玉始包貢。公車三千牘。字字岌飛動。氣力倒犀象。律呂諧鸞鳳。天驥西極來。矯矯不受鞚。飛騰上臺閣。廢放落雲夢。至寶不侵蝕。終亦老侍從。晚途遷海表。萬里天宇空。豈惟騎鯨魚。遂欲跨蟬蛸。心空物莫撓。氣老筆愈縱。糝糠郊祀歌。遠友清廟頌。我生雖後公。妙句得吟諷。整衣拜遺像。千古尊正統。

心太平菴余取黃庭語名所寓室

天下本無事。庸人擾之耳。胸中故湛然。忿欲定誰使。本心倘不失。外物真一蠅。困窮何足道。持此端可死。空齋夜方中。窗月淡如水。忽有清磬鳴。老夫從定起。

訪客至西郊

撼撼敗葉飛。黯黯寒雲低。村墟與市里。觸目一慘悽。今日病體輕。駕言適城西。丹柿滿野店。青帘出江隄。獵騎載雉兔。樵檐懸鷄雞。居人各自得。使我念故谿。故谿不敢說。況復朝金閨。傷哉鬻雪翁。歲晚猶牧羝。下愚不自還。大惑終身迷。君恩何由報。力耕愧黔黎。

得都下八月書報蒙恩牧絅州

鳳城書到錦江邊。故里歸期愈渺然。掌上山川初入夢。壺中日月尙經年。方輪落落難推轂。倦馬駸駸怕著鞭。未佩魚符無吏責。看花且作拾遺顛。戊期尙在明年冬。

晚起

賣劍捐書絕世緣。掩關高枕送流年。久從道士學踵息。誰管門生嘲腹便。化蝶飛時嗟昨夢。睡蛇去後喜安眠。欠伸看起東窗日。也似金鑿過八甌。

又

學道逍遙心太平。幽窗鼻息撼牀聲。柳花無蒂蠻氈煖。龜甲有紋繒帳明。候起兒童陳盥櫛。笑衰人客鬪柴荆。此生睡足無餘念。安用元戎報五更。

江樓吹笛飲酒大醉中作

世言九州外。復有大九州。此言果不虛。僅可容吾愁。許愁亦當有許酒。吾酒釀盡銀河流。酌之萬斛玻璃舟。酣宴五城十二樓。天爲碧羅幕。月作白玉鉤。織女織慶雲。裁成五色裘。披裘對酒難爲客。長揖北辰相獻酬。一飲五百年。一醉三千秋。卻駕白鳳騶。班虬下與麻姑戲。玄洲錦江吹笛餘。一念再過劍南應小留。

晚登子城

江頭作雪雪未成。北風吹雲如有營。驅車出門何所詣。一放吾目登高城。城中繁雄十萬戶。朱門甲第何嶢嶢。錦機玉工不知數。深夜窮巷聞吹笙。國家自從失河北。煙塵漠漠暗兩京。胡行如鬼南至海。寸地尺天皆苦兵。老吳將軍獨護蜀。坐使井絡無機槍。名都壯邑數千里。至今不聞戎馬聲。安危自古有倚伏。相

持默默非敵情。棘門灞上勿兒戲。犬羊豈憚渝齊盟。

夙興出謁

嗜酒狂無敵。居家嬾有餘。苦寒愁手版。美睡付肩輿。覓句吟哦慣。逢人省識疎。亦知歸去好。無地著蝸廬。

十一月三日過升仙橋作

早過升仙不暇炊。橋邊買麩療朝飢。紛紛滿座誰能識。大似新豐獨酌時。

又

熨手金鞭天馬駒。冰河雪谷笑談無。只言燕趙多奇士。豈必書生盡腐儒。

又

橋邊沙水綠蒲老。原上煙蕪黃犢閑。老子真成興不淺。憑鞍歸夢遶家山。

遣興

蓬壺舊隱已微茫。浪迹紅塵樂未央。縱酒山南千日醉。看花劍外十年狂。新詩刻燭驚詞客。駿馬追風戲鞠場。要是世間男子事。不須臺省競飛翔。

草堂拜少陵遺像

清江抱孤村。杜子昔所館。虛堂塵不掃。小徑門可款。公詩豈紙上。遺句處處滿。人皆欲拾取。志大才苦短。計公客此時。一飽得亦罕。阨窮端有自。寧獨坐房琯。至今壁間像。朱綬意蕭散。長安貂蟬多。死去誰復算。

青羊宮小飲贈道士

青羊道士竹爲家。也種玄都觀裏花。微雨晴時看鶴舞。小窗幽處聽蜂衙。藥爐宿火熒熒煖。醉袖迎風獵獵斜。老我一官眞漫浪。會來分子淡生涯。

夜寒

清夜焚香讀楚詞。寒侵貂褐歎吾衰。輕冰滿研風聲急。忽記山陰夜雪時。

又

斗帳重茵香霧重。膏粱那可共功名。三更騎報河冰合。鐵馬何人從我行。

書懷

武擔山上望京都。誰記黃公舊酒壚。宿負本宜輸左校。寬恩猶聽補東隅。一官漫浪行將老。萬卷縱橫只自憊。甫里松陵在何許。古人投劾爲尊鱸。

記夢

烏巾白紵憶當年。抵死尋春不自憐。顛顛劍南雙鬢改。夢中猶上暗門船。

又

團臍霜蟹四腮鱸。樽俎芳鮮十載無。塞月征塵身萬里。夢魂也復醉西湖。

醉中出西門偶書

古寺閑房閉寂寥。幾年耽酒負公朝。青山是處可埋骨。白髮向人羞折腰。末路自悲終老蜀。少年常願從征遼。醉來挾箭西郊去。極目寒蕪雉兔驕。

訪客不遇

風急斜吹帽。泥深亂濺衣。杜門常畏罵。訪客卻空歸。老馬舉蹄癩。枯槐無葉飛。馳驅幾時了。散髮憶苔磯。

劍客行

世無知劍人。太阿混凡鐵。至寶棄泥沙。光景終不滅。一朝斬長鯨。海水赤三月。隱見天地間。變化豈易測。國家未滅胡。臣子同此責。浪迹潛山海。歲晚得劍客。酒酣脫匕首。白刃明霜雪。夜半報讎歸。斑斑腥帶血。細讎何足問。大恥同憤切。臣位雖卑賤。臣身可屠裂。誓當函胡首。再拜奏北闕。逃去變姓名。山中餐玉屑。故蜀別苑在成都。西南十五六里。梅至多有兩大樹。天矯若龍。相傳謂之梅龍。予初至蜀。嘗爲作詩。自此歲常訪之。今復賦一首。丁酉十一月也。

昔年曾賦西郊梅。茫茫去日如飛埃。卽今衰病百事懶。陳迹未忘猶一來。蜀王故苑犁已遍。散落尙有千雪堆。珠樓玉殿一夢破。煙蕪牧笛遺民哀。兩龍臥穩不飛去。鱗甲脫落生莓苔。精神最遇雪月見。氣力苦戰冰霜開。羈臣放士耿獨立。淑姬靜女知誰媒。摧傷雖多意愈厲。直與天地爭春回。蒼然老氣壓桃杏。笑我白髮心尙孩。微風故爲作嫵媚。一片吹入黃金鬢。

閑意

柴門雖設不曾開。爲怕人行損綠苔。妍日漸催春意動。好風時捲市聲來。學經妻問生疎字。嘗酒兒斟澹盃。安得小園寬半畝。黃梅綠李一時栽。

飲罷夜歸

老病畏多酌。退閑愁夜行。市燈疎欲盡。樓月澹初生。露冷莎蛩咽。天高塞雁征。歸來差自喜。擁被聽疎更。

江亭冬望

霜落江清水見魚。偶來徙倚草亭孤。雪天黯淡常如晚。煙樹微茫直欲無。下澤乘車終碌碌。上方請劍漫區區。擬將疎逸消豪氣。尋罷酒徒尋獵徒。

大風登城

風從北來不可當。街中橫吹人馬僵。西家女兒午未粧。帳底爐紅愁下牀。東家喚客宴畫堂。兩行玉指調絲簧。錦繡四合如垣牆。微風不動金猊香。我欲登城望大荒。勇欲爲國平河湟。才疎志大不自量。西家東家笑我狂。

書雨

仲冬候始寒。丙夜天正黑。雨來挾風助。吼擊不遺力。聲如拔高山。勢若伐強國。初憂老柏折。遂恐石筍踣。乾坤本無心。百神各效職。蛟龍鬪歲暮。豪橫理莫測。農功幸已成。龍怒亦會息。屋漏何足言。袖手姑默默。一笑

半醉微吟不怕寒。江邊一笑覺天寬。莫愁艇子急衝雨。何遜梅花頻倚闌。萬事任從皮外去。百年聊作夢中觀。放翁縱老狂猶在。倒盡金壺燭未殘。

歲晚懷鏡湖舊隱慨然有作

公府還家鬢未秋。鏡湖南畔決歸休。讀書精舍豈輕出。采藥名山成遠遊。白墮興來猶小醉。青精材足更

何求俗間毀譽惟堪笑。常隘韓公咎斗牛。

華髮

華髮蕭蕭老蜀關。倦飛可笑不知還。人生只似駒過隙。世事莫驚雷破山。光景半銷樽酒裏。英豪或隱博徒間。車帷閉置真何樂。書劍飄然未厭閑。

歎息

國家圖籙合中興。歎息吾寧粥飯僧。賣劍買牛衰可笑。壞裳爲袴老猶能。曉過射圃雲藏壘。夜讀兵書雨灑燈。安得龍媒八千騎。要令窮虜畏飛騰。

冬至

歲月難禁節物催。天涯回首意悲哀。十年人向三巴老。一夜陽從九地來。上馬出門愁斂版。還家留客強傳杯。探春漫道江梅早。盤裏酥花也鬪開。

城南尋梅得

老子今年嬾賦詩。風光料理鬢成絲。青羊宮裏春來早。初見梅花第一枝。

又

黯淡江天雪欲飛。竹籬數掩傍苔磯。清愁滿眼無人說。折得梅花作伴歸。

又

青煙漠漠暗西村。問訊梅花置一尊。冷淡生涯元不惡。卻嫌歌吹合江園。成都故事合江園。官梅開及五

分。卽府君領客來遊。

又

籬邊細路竹間庵。一段風流擅劍南。吾國以香爲佛事。客來試向鼻端參。

書歎

歷盡危塗井與參。鬢毛飽受雪霜侵。平生不可俗子眼。後世誰知吾輩心。河洛方行胡正朔。山林虛度醉光陰。浩歌未闕先投枕。衰病常憂感慨深。

感興

少小遇喪亂。妄意憂元元。忍飢臥空山。著書十萬言。賊亮負函貸。江北煙塵昏。奏記本兵府。大事得具論。請治故臣罪。深絕衰亂根。言疎卒見棄。袂有血淚痕。爾來十五年。殘虜尙遊魂。遺民淪左袵。何由雪煩冤。我髮日益白。病骸寧久存。常恐先狗馬。不見清中原。

又

高帝王蜀漢。天下豈易圖。幡然用其鋒。項羽不支梧。嗟余昔從戎。久戍南鄭墟。登高望夕烽。咫尺咸陽都。羣胡本無政。剽奪常自如。民窮訴蒼天。日夜思來蘇。連年況枯旱。關輔尤空虛。安得節制帥。弓刀肅馳驅。父老上牛酒。善意不可孤。諸將能辦此。機會無時無。

暮冬夜宴

官機錦茵金蹙鳳。舞娃釵墮雙鬟重。寶爐三尺香吐霧。畫燭如椽風不動。主人愛客情無已。箏聲未斷歌



聲起亦知百歲等朝露。便恐一歡成覆水。爐紅酒綠春爲回。坐上梅花連夜開。堂前只尺異氣候。冰合平池霜壓階。

枕上

枕上三更雨。天涯萬里遊。蟲聲憎好夢。燈影伴孤愁。報國計安出。滅胡心未休。明年起飛將。更試北平秋。

謁石犀廟

閑過石犀祠。登室一歎欷。江回陵谷變。碑斷市朝非。有玉蜀時修廟碑銘。荒圃連寒壠。斜陽映夕霏。興亡俱昨夢。惆悵跨驢歸。

江上散步尋梅偶得三絕句

小園風月不多寬。一樹梅花開未殘。剝啄敲門嫌特地。緩拖藤杖隔籬看。

又

鐘殘小院欲消魂。漠漠幽香伴月痕。江上人家應勝此。明朝更出小南門。萬里橋門一名小南門。

又

小南門外野人家。短短疎籬繚白沙。紅稻不須鸚鵡啄。清霜催放兩三花。

漣漪亭賞梅

判爲梅花倒玉卮。故山幽夢憶疎籬。寫真妙絕橫窗影。徹骨清寒蘸水枝。苦節雪中逢漢使。高標澤畔見湘纍。詩成怯爲花拈出。萬斛塵襟我自知。

芳華樓賞梅

素娥竊藥不奔月。化作江梅寄幽絕。天工丹粉不敢施。雪洗風吹見真色。出籬藏塢香細細。臨水隔煙情脈脈。一春花信二十四。縱有此香無此格。放翁年來百事惰。唯見梅花愁欲破。金壺列置春滿屋。寶髻斜簪光照坐。百榼淋漓玉斝飛。萬人辟易銀鞍過。不惟豪橫壓清臞。聊爲詩人洗寒餓。

浣花賞梅

老子人間自在身。插梅不惜損烏巾。春回積雪層冰裏。香動荒山野水濱。帶月一枝低弄影。背風千片遠隨人。石家樓上貪吹笛。肯放朝朝玉樹新。

蜀苑賞梅

十里溫香撲馬來。江頭還見去年梅。喜開剩欲邀明月。愁落先教掃綠苔。跌宕放翁新醉墨。淒涼廢苑舊歌臺。盛衰自古無窮事。莫向昆明歎劫灰。

大醉梅花下走筆賦此

閉門坐歎息。不飲輒千日。忽然酒興生。一醉須一石。檐頭花易老。旗亭酒常窄。出郊索一笑。放浪謝形役。把酒梅花下。不覺日既夕。花香襲襟袂。歌聲上空碧。我亦落烏巾。倚樹吹玉笛。人間奇事少。頗謂三勅敵。酒闌江月上。珠樹挂寒壁。使疑從此仙。朝市長掃迹。醉歸亂一水。頓與異境隔。終當騎梅龍。海上看春色。梅龍蓋蜀苑中故物也。

之廣都憩鐵像院

歲暮天苦寒。風雨復乘之。道邊得古寺。欣然具晨炊。瘦樹立中庭。斷蔓絡短籬。小僧爲設爐。童子燒槁枝。坐令手足柔。髭鬚失冰澌。敬禮龕中像。盡讀廡下碑。少年志四方。故里了不思。晚知行路難。更覺遊子悲。一官始巴夔。剡曲歸何時。置之勿復道。爛醉忘天涯。

廣都江上作

微波不搖江。纖雲不行天。我來倚杖立。天水相澄鮮。平遠望不盡。日落自生煙。梅花耿獨立。雪樹明前川。好風吹我衣。春色已粲然。東村聞酒美。買醉上漁船。

宿龍華山中寂然無一人方丈前梅花盛開月下獨觀至中夜

梅花如高人。枯槁道愈尊。君看空谷豈。比倚市門。我來整冠佩。潔齋三沐熏。亦思醉其下。燕媚恐澆君。敬抱綠綺琴。玄酒挹古罇。月明流水閑。一洗世濁昏。摸寫香與影。計君已厭聞。老我少傑思。尙喜非陳言。

次韻張季長正字梅花

倚橋臨水似催詩。戲伴鵝黃上柳絲。萬里西湖驚斷夢。二年東閣憶幽期。游嘗官唐安。插瓶直欲連全樹。簪帽憑誰揀好枝。一味淒涼君勿歎。平生初不願春知。

次韻季長見示

倚遍南樓十二欄。長歌相屬寓悲歡。空懷鐵馬橫戈意。未試冰河墮指寒。成敗極知無定勢。是非元自要徐觀。中原阻絕王師老。那敢山林一枕安。

廣都道中呈季長

天上石渠郎。能來伴楚狂。風霜朝並轡。燈火夜連牀。江水不勝綠。梅花無賴香。劇談那得住。出處要平章。

看梅歸馬上戲作

平明南出笮橋門。走馬歸來趁未昏。漸老更知閑有味。一冬強半在梅村。

又

本爲梅花判痛飲。卻嗅梅香消宿醒。日欲落時始上馬。青羊宮前聞發更。

又

一點不雜桃李春。一水隔斷車馬塵。恨不來爲清夜飲。月中香露溼烏巾。

又

江路疎籬已過清。月中霜冷若爲情。不如折向金壺貯。畫燭銀燈看到明。

又

江郊車馬滿斜暉。爭趁南城未闔扉。要識梅花無盡藏。人人襟袖帶香歸。

別後寄季長

俗子俗到骨。一揖已溷人。不知此曹面。何處得許塵。我非作崖壑。汝自不可親。道途逢使君。令我生精神。頓增江山麗。更覺風月新。對牀得晤語。顛倒夜達晨。亟起忘縛紵。小醉或墮巾。繚出錦城南。問訊江梅春。煎茶憩野店。喚船截煙津。淒涼弔廢苑。蕭散誇閑身。暮歸度略約。月出水鱗鱗。思君去已遠。此會何由頻。

中夜對月小酌

今夕復何夕。素月流清輝。徘徊入我堂。化作白玉墀。栖鳥滿高樹。空庭結煙霏。可憐如許景。早眠人不知。我幸與周旋。一醉那得辭。整我接離巾。樹我翡翠卮。清愁不可耐。三嗅梅花枝。

客愁

騎馬出門無所詣。端居正爾客愁侵。蒼顏白髮入衰境。黃卷青燈空苦心。天下極知須雋傑。書生何恨死山林。消磨未盡胸中事。梁甫時時尙一吟。

詩酒

酒隱凌晨醉。詩狂徹旦歌。憫憐蝸左角。嘲笑蠅南柯。風月隨長笛。江湖入短蓑。平生會心處。最向漆園多。

道室夜意

寒泉漱酒醒。午夜誦仙經。茶鼎聲號蚓。香盤火度螢。齋心守玄牝。閉目得黃寧。寄語山中友。因人送茯苓。

道室晨起

紙帳晨光透。山爐宿火燃。雞鳴猶喔喔。鶉起已翩翩。形槁寒巖木。心凝古澗泉。何須更臨鏡。斷是一癯仙。

城南王氏莊尋梅

澗池積槁葉。茆屋圍疎籬。可憐庭中梅。開盡無人知。寂莫終自香。孤貞見幽姿。雪點滿綠苔。零落尙爾奇。我來不須晴。微雨正相宜。臨風兩愁絕。日暮倚筇枝。

遊萬里橋南劉氏小園

佳園寂無人。滿地梅花香。閑來曳拄杖。臘月日已長。朱橋架江面。欄影搖波光。奇哉小垂虹。夢破鱸魚鄉。

汀鷺一點白。煙柳千絲黃。便欲喚釣舟。散髮歌滄浪。可憐隔岸人。車馬日夜忙。我歸門復掩。寂歷挂斜陽。  
過笮橋道中龍祠小留

江邊龍廟何年作。白浪花中插朱閣。朝暾漸上宿霧收。春氣已動晨霜薄。我來倚欄一悵然。蘆花滿空如柳綿。安得身爲雙白鷺。飛上灘頭卻飛去。

道上見梅花

載酒房湖風日美。探梅喜折一枝新。今朝忽向街頭見。萬萼千跗俗卻春。

倚樓

減盡朱顏白髮新。高樓徙倚默傷神。未酬馬上功名願。已是人間老大身。太史周南方臥疾。拾遺劍外又逢春。一杯且爲江山醉。百萬呼盧迹已陳。

寄王季夷

平生吾子最知心。巴隴飄零歲月侵。萬里喜聞身尚健。五更惟有夢相尋。插花意氣狂如昨。中酒情懷病至今。共約暮年須強飯。天台廬阜要登臨。

丁酉除夕

浮生過五十。光景如飛鴻。寒暑倏仰間。四序忽已終。殊方感飄泊。晚境嗟龍鍾。桃符與爆竹。嬾復隨兒童。不寐非守歲。燕坐夜過中。氣定神自凝。海日何曛曛。豈惟三彭逃。坐覺六入空。徂年勿惆悵。閱世方無窮。

正月二日晨出大東門是日府公宴移忠院

成都春事早。開歲已暄妍。熈尾傳盃後。遨頭出郭前。爭門金騶裏。滿野繡輜駢。白髮花邊醉。何妨似少年。

小飲落梅下戲作送梅一首

零落梅花不自由。斷腸容易付東流。與人又作經年別。問月應知此夜愁。已是狂風卷平野。更禁橫笛起危樓。何時小雪山陰路。處處尋香繫釣舟。

立春

鬢毛蕭颯寸心灰。生怕新年節物催。幸是身閑朝睡美。忽聞鼓吹打春回。

初春出遊戲作

綠窗百舌喚春眠。問柳尋花意已便。京洛化衣無夢去。邯鄲觀伎有詩傳。銅壺閣下閑欹帽。石鏡坊前戲墜鞭。酒隱人間君勿誚。定勝山澤作臞仙。

初春遣興始於志退休而終於惓惓許國之忠亦臣子大義也

爛熟思來怕熱官。退飛心地喜輕安。栖魚正可取熊掌。食肉何須知馬肝。放眼柳梢初暗動。褪花梅子已微酸。典衣剩作江頭醉。莫謂天涯苦鮮歡。

又

大隱悠悠未棄官。俸錢雖薄卻心安。人方得意矜蝸角。天豈使予爲鼠肝。佳日劇碁忘旅恨。短衣馳射壓儒酸。小桃楊柳爭時節。載酒江頭罄一歡。

又

白髮淒涼故史官。十年身不到長安。卽今天末弔形影。何日上前傾肺肝。孤憤書成詞激烈。五噫歌罷意辛酸。此懷欲說無人共。安得相攜素所歡。

予年十六始識葉晦叔於西湖上。後二十七年晦叔之弟聲叔來爲臨邛守。相遇於成都。晦叔沒久矣。訪其遺文略無在者。乃賦此詩。

故人零落久山丘。誰記京華第一流。曹霸揮毫空萬馬。庖丁投刃解千牛。相逢夢境何勞記。追想清言未免愁。雷電取將遺稿盡。他年虛有茂陵求。

初春探花有作

燈山昨夢歎忽忽。便恐新春過眼空。千縷未搖官柳綠。一梢初放海棠紅。金羈絡馬閑遊處。彩筆題詩半醉中。流落天涯何足道。年年常策探花功。

遊諸葛武侯書臺

沔陽道中草雖離。臥龍往矣空遺祠。當時典午稱猾賊。氣喪不敢當王師。定軍山前寒食路。至今人祠丞相墓。松風想像梁甫吟。尙憶幡然答三顧。出師一表千載無。遠比管樂蓋有餘。世上俗儒寧辦此。高臺當日讀何書。

觀花

我遊西川醉千場。萬花成圍柳著行。紅錦地衣舞霓裳。翠帟繡袂天寶粧。清歌一發無留觴。嫋嫋餘聲縈杏梁。黃金絡馬照路光。自護羸羸觀海棠。搜奇選勝日夜忙。不惟燕宮碧雞坊。暮歸奚奴負錦囊。路人爭



看放翁狂。

張園觀海棠

朝陽照城樓。春容極明媚。走馬蜀錦園。名花動人意。嚴妝漢宮曉。一笑初破睡。定知夜宴歡。酒入妖骨醉。低鬟羞不語。困眼嬌欲閉。雖豔無俗姿。太息真富貴。結束吾方歸。此別知幾歲。黃昏廉纖雨。千點哀紅淚。

月夕

醉從東郭歸。散髮臨前楹。呼僮淨埽地。勿使斲月明。庭空臥松影。簷迴送鐸聲。鐘斷心境寂。露下毛髮清。出門碧霧合。九陌無人行。坐令錦官城。化作白玉京。

夜飲卽事

天涯久客我何堪。聊喜燈前得縱談。磊落金盤薦糖蟹。纖柔玉指破霜柑。蠲園寶馬人將起。花墜紗巾酒正酣。更作茶甌清絕夢。小窗橫幅畫江南。

夜宴賞海棠醉書

便便癡腹本來寬。不是天涯強作歡。燕子歸來新社雨。海棠開後卻春寒。醉誇落紙詩千首。歌費纏頭錦百端。深院不聞傳夜漏。忽驚蠟淚已堆盤。

二月十六日賞海棠

常年春半花事竟。今年春半花始盛。衰翁不減少年狂。走馬直與飛蝶競。妍華有露洗愈明。纖弱無風搖不定。莫放飄零作紅雨。剩看倩笑臨粧錦。溪梅枯槁墮巖谷。山杏輕浮真妾媵。欲誇絕豔不勝說。縱欠濃

香何足病。華燈銀燭搖花光。翠杓金船豪酒興。夜闌感事獨淒然。繁枝空折誰堪贈。

卽席

解鞅名園眼倍明。殷勤翠袖勸飛觥。海棠紅杏欲無色。蛺蝶黃鸝俱有情。去日不留春漸老。歸舟已具客將行。倦遊短鬢無多綠。生怕尊前唱渭城。

東歸有日書懷

萬里橋邊白版扉。三年高臥謝塵鞿。半窗竹影碁僧去。滿棹蘋風釣伴歸。看鏡已添新雪鬢。聽雞重拂舊朝衣。故人零落今無幾。華表空悲老令威。

眉州披風榭拜東坡先生遺像

蜿蜒回顧山有情。平鋪十里江無聲。孕奇蓄秀當此地。鬱然千載詩書城。高臺老仙誰所寫。仰視眉宇寒崢嶸。百年醉魂吹不醒。飄飄風袖筇枝橫。爾來逢迎厭俗子。龍章鳳姿我眼明。北扉南海均夢耳。謫墮本自白玉京。惜哉畫史未造極。不作散髮騎長鯨。故鄉歸來要有日。安得春江變酒從公傾。

